

Èkwo-ozì Kẹ̀ Mbù, Pọ̀lu Deru Nù Ndu
Kọrentu

¹ Ọwaa bụ ẹkwo-ozì, mụbe Pọlu ede; mbụ onye ono, Kéreshi Jizọsu kuru bya emee ya ọ bụru onye-ishi-ozì iya. Ọ bụru g'ọ bụ uche Chileke bụ ono. Onye mu l'iya tukuroru ede ẹkwo ono bụ nwanna anyi, bụ Sosutenisu.

² Ndu eede iya anụ bụ ndu Chiochi kẹ Chileke, bụ ndu ọphu nọ lẹ Kọrentu; gude iya ekele unubẹ ndu Chileke doberu iche g'unu bụru ndu dū nsọ opfu l'unu lẹ Jizọsu Kéreshi tųgbaru bụru nanụ. Eedekwa iya phọ anụ onyemonye, nọ l'ẹkameka, bụ ndu abajeru Nnajiuphu anyi, bụ Jizọsu Kéreshi ẹja. Jizọsu ono bụ Nnajiuphu phẹ bya aburu Nnajiuphu anyịbedua kwaphọ.

³ Gẹ Chileke, bụ Nna anyi; mẹ Nnajiuphu anyi, bụ Jizọsu Kéreshi meeru unu eze-iphe-ọma; mekwaaphọ gẹ nchị dū unu doo.

Ekele k'iphe-ọma, shi l'ẹka Kéreshi

⁴ Mu anọduje ekeleru unu Chileke mu ekele k'eze-iphe-ọma, o shi l'ẹka Kéreshi Jizọsu emeru unu. ⁵ L'unu lẹ Kéreshi tųgbaru bụru nanụ; unu shi ẹgube ono baa eze l'iphemiphe, shi iya l'ẹka. Unu tųko opfu ọnu magbuaru tųko mmamiphe magbuaru. ⁶ Ozi kẹ Kéreshi ono bẹ e mewaru ọ nọshia unu ọkpobe ike l'obu; ⁷ k'ọphu bụ l'ọ tọ dudu iphe, bụ iphe Unme Chileke anụ anunu mẹ nanụ, duru ọphu duru unu ọko; mbụ g'unu nọ ngabẹ teke Nnajiuphu anyi, bụ Jizọsu Kéreshi a-lwa azụ goshi onwiya l'ọdu-biribiri iya. ⁸ Jizọsu ono e-me unu g'unu shihu dųngu dųngu nno jasụ l'ikpetemazụ. Ọo ya bụ; g'ọ tọ dū ẹka aata unu ọta mbọku ono, Nnajiuphu anyi, bụ Jizọsu Kéreshi e-kpe ikpe ono. ⁹ Chileke apfushijekwa

ike l'iphe, o pfuru. O b̄uru Chileke ono b̄e kuru unu g'unu l̄e Nwa iya, b̄u Jiz̄osu K̄éreshi bya bya ab̄uru nan̄u gbar̄u mgba l'iphemiphe; mb̄u onye b̄uhukwapho Nnaj̄iuphu anyi ono.

Ekwo, d̄u l̄e Ch̄iochi

¹⁰ S̄u-a; o kwa Nnaj̄iuphu anyi, b̄u Jiz̄osu K̄éreshi b̄e mu n̄o l'eka arw̄o unub̄e unwunna anyi s̄u g'unu w̄uj̄e onu nan̄u g'unu hak̄ota l'iphemiphe, b̄u iphe unu epfu. Oo ya b̄u g'ekwo ta ad̄u l'echilab̄o unu. Unu t̄ugbakwa b̄uru nan̄u okpobe ab̄uru. G'egomunggo b̄uru unu nan̄u; idzu unu ab̄uj̄eru nan̄u. ¹¹ Unwunna mu; l'iphe, mu epfu ono b̄ukwa l̄e ndibe Kuloyi byaakwaru ak̄ooru mu k̄orwuaru mu iya al̄i s̄u l'unu kwar̄u l̄e nt̄umego. ¹² Mb̄u l'iphe, mu epfu b̄u l'a s̄uru l'unu an̄oduje adz̄okashi iya. Onye ophu as̄u l̄e ya lar̄u P̄olu; onye as̄u l̄e ya lar̄u Ap̄olosu; onye as̄u l̄e ya lar̄u Pȳita; onye as̄u l'oo K̄éreshi b̄e ya lar̄u. ¹³ ?A gb̄enu keshiwaa K̄éreshi ekeshi? ?B̄u P̄olu b̄e apfugburu l'oswebe l'iswi ehu unu? T̄oo ?b̄u epha P̄olu b̄e e gude mee unu baputizimu?

¹⁴ Mu ekele Chileke ekele l'ō -t̄o b̄u Kirisup̄osu ȳe Gaȳosu m̄e mu as̄u l'ō t̄o d̄udu g'unu ha m̄e onye lan̄u mu meru baputizimu. ¹⁵ Oo ya b̄u g'ō t̄o d̄u onye a-s̄u l'e gude epha mu mee ya baputizimu. ¹⁶ Aa! Ndu mu mef̄uaru baputizimu b̄u Sutifanasu ȳe ndibe iya. O to doduru mu ēnya l'ō d̄ubaaru ndu ozo, mu meru baputizimu ab̄udu ndu ono. ¹⁷ K̄éreshi ta ab̄ukwa baputizimu b̄e o yeru mu ḡe mu bya emeje. Iphe, o ziru mu ḡe mu bya emeje b̄ukwa ḡe mu zije ndiphe ozi-oma ono. Ḡe mu te egudekwa opfu, egoshi mmamiphe ndiphe zi iya; a -n̄onyaa o t̄urwua ike, d̄u l'anw̄uhu, K̄éreshi nw̄uhuru l'oswebe.

K̄éreshi b̄u ike bya ab̄uru mmamiphe, shi l'eka Chileke

¹⁸ L'opfu k'anwũhu Kéreshi l'oswebe ono bẹ bukwa iphe-eswe l'ẹnya ndu ala l'iswi; obenu l'anyịbe ndu a dzọtaru bẹ ọ bụ ike, shi l'ẹka Chileke. ¹⁹ L'e dekwaru sụ:

“Mmamiphe ndu maru iphe
bẹ mu e-mebyishi
emebyishi!

Mu emee nkwaṁnya ndu
manụkaru iphe

l'ọ bụru iphe-mmanụ.*”

²⁰ Sụ-a; ?bũhunu awe bẹ ndu mmamiphe p̄furu nta? ? Bũ awe bẹ ndu edeje ẹkwo p̄furu? ?Bũ awe bẹ ndu maru opfu ẹ mgboko-a p̄furu? ?Chileke te emeadaru gẹ mmamiphe, ndiphe bụru iphe-eswe?

²¹ A makwaru-a ẹ Chileke meru nemadzụ k'ọphu oo-shi ẹ mmamiphe, ọ nũru iya maru iya; obenu ẹ nemadzụ te egudedu iya maru iya. Noo g'ọ shitaru Chileke sụ ẹ ya e-shi l'iphe ono, ndu maru iphe sũru l'ọ bụ iphe-eswe ono, bụ iya bụ k'ozi-oma ono, anyi ezi ono; gude dzọ ndu kwetarụ nũ. ²² Ndu Jiu bẹ bụ iphe-ọhumalenya bẹ ẹphe sũru g'e goshi phẹ; ndu Gurisu bukwanuru mmamiphe bẹ ẹphe achọ. ²³ Obenu l'iphe, anyịbedua ezi ozi iya bụ l'a kpọpyaberu Kéreshi l'oswebe. Ono bũru ụpfu, adụ ndu Jiu l'ọkpa; bya abũru iphe-eswe l'ẹnya ndu abũdu ndu Jiu. ²⁴ Obenu ẹ ndu Chileke kuru; mbũ ndu Jiu mẹ ndu abũdu ndu Jiu; bẹ Kéreshi ono bụ ike Chileke bya abụkwarupho mmamiphe shi l'ẹka Chileke. ²⁵ L'iphe, Chileke eme; ọ dũ ẹhu-eswe ẹhu-eswe; gbẹkwa ka mmamiphe ndiphe shii; tẹme iphe, gbẹ dũ g'ọ bụ Chileke arwũhu kakwaphọ ụnwu-eliphe ike.

Gẹ Chileke emeje iphe iya

* 1:19 1:19 Gũnaa Azá 29:14.

²⁶ Ọo ya bụ ị-a; ụnwunna mu; unu nyatajẹkwa iphe unu shi bụru tẹme Chileke kua unu. Unu te eshidu dū igwe marwua iphe gẹ ndiphe, maru ẹkwo amajeru iya; ọphu unu eshidu dū igwe nweru ẹnya; ọphu ndu shi l'oke amadu eshidu baa ishi. ²⁷ Obenu ị Chileke họtaleru-a iphe, dū ẹhu-eswe ẹhu-eswe l'ẹnya ndiphe; gude mee ndu maru iphe iphe-iphere. Ọ bya ahọtakwapho iphe, rwuhuru arwuhu l'ẹnya ndiphe; gude mee ndu ọkphehu dū iphe-iphere. ²⁸ Chileke họtaru iphe, ẹnya lwaru l'eliphe; mbu iphe, ndiphe agubeduru iphe, iphe, ẹphe suru l'ọ tọ dudu iphe, ọ bu; ọ họt a iya gude mee iphe, ndiphe riru l'ọ bu ọkpobe iphe g'ọ tọ dū iphe, ọo-bu. ²⁹ Ọo ya bụ g'ọ tọ dū nemadzū, e-je aba abaa l'iphu Chileke. ³⁰ Obenu l'unubedua bẹ Chileke mewaru unu ị Kéreshi Jizosu tugba buru nanu; tẹme ọ byakwapho emee ya; ọ buru mmamiphe k'anyibedua. Ọo ya bẹ o shi l'ẹka; ọ buru iya bụ l'anyi aburu ndu pfuberekoto l'iphu Chileke. Anyi shi iya l'ẹka buru ndibe Chileke; bya aburu ndu a gbataru l'iphe-ẹji, pyitaru anyi l'ẹkpiri. ³¹ Ọo ya bụ g'ọo-buru iphe, ẹkwo-opfu Chileke pfuru sū: “Onye ọ dū g'ọ baa abaa; g'onye ono nọdu Nnajiuphu l'ẹka ba iya.”

2

Kéreshi l'oswebe

¹ Sū-a; ụnwunna mu; teke mbu ono, mu byapfutaru unu bya unu ezi ozi-oma kẹ Chileke ono, a makaharu l'ọ bu ọkpobe-opfu ono; mu te egudekwa opfu mecha mecha zia ya unu; ọphu mu abyakwaru unu egoshi ị mu nwuru ẹkwo buru ọ-maru-ọ-machata. ² Ị mu pfukpọakwaru sū ị mu e-mekiritakpọoro l'echilabo unu g'ọ tọ dudu iphe, mu maru; gbahaa Jizosu Kéreshi kpẹekpu, bu iya bu onye a kpọyaberu l'oswebe. ³ Ọzo bu ị teke ono,

mu l'unu shi nọdu ono bẹ ike adudu mu; tẹme ndzu shi nọdu agụ-shikwa mu phọ ike; tẹme ẹhu shi etehukwa mu phọ etete shii. ⁴ Ọphu iphe, mu pfuru epfufu mẹ ozi, mu ziru ezizi, abudu iphe, mu gude ire mecha mecha k'ọphu manukarunu pfua g'eeshi g'ee-kweta iya. Ọ chia iphe, meru nū bụ lẹ mu goshiru unu l'ọo Unme Chileke yẹe ike kẹ Chileke ere ire l'opfu ono; ⁵ k'ọphu ekwekwe, unu kweru kẹ Kéreshi tee shidu lẹ mmamiphe nemadzu; g'o shichia l'ike kẹ Chileke.

Mmamiphe Chileke

⁶ Ọle-a; ọ bụjekwaru-a; mu lẹ ndu kawaru ẹnya l'iphe kẹ Unme Chileke nọdu epfu; mu egude mmamiphe epfu eyeru phẹ. Ọle ọ tọ bụkwa mmamiphe ọphu shi l'ẹka ndiphe; ọphu ọ bụkwa mmamiphe ọphu shi l'ẹka ndu eze ndu mgboko l'ọphu; ẹphebedua bẹ Chileke emewaa ike phẹ g'ọ buru iphe-mmanu. ⁷ Mmamiphe ọphu mu egudeje epfu bụkwa mmamiphe ọphu Chileke shi domia edomi; mmamiphe ọphu o meru gẹ ndiphe ta ama. Mmamiphe ono bụ lẹ Chileke tubuhakpọwaruro tẹme o mee mgboko; l'anyi l'iya a-gbaru mgbal'ọdu-biribiri iya. ⁸ Mmamiphe k'ono ta adukwa ndu bụ ndu-ishi lẹ mgboko-a mgburugburu maru iya nū. Ọme ẹphe maru iya; m'ẹphe te eje akpọpyabe Nnajiuphu ono l'oswebe; mbụ Nnajiuphu ono, yẹe Chileke gba mgbal'ọdu-biribiri iya ono. ⁹ Obenu l'e deru l'ẹkwo-opfu Chileke sụ:

“Iphe ẹnya ahumajeduru;
 ọphu nchị anumajeduru
 iya;
 ọphu ọ dudu onye
 egomunggo rwujeru
 l'oo-mee;
 bẹ Chileke meru doberu

ndu yeru iya obu.*”

¹⁰ Chileke gbẹwa l'ẹka Unme nkiya goshi anyi iphe ono, o shi domia edomi ono. Lẹ Unme Chileke avofutajekwa iphemiphe, bukpo iphe, e domiru edomi je akpachaa l'idzù, Chileke chiruro l'ime obu iya k'ememe dobe. ¹¹ Lẹ-a; ?bu onye maru iphe nọ nwibe iya l'obu? ?Tobudu o nonu maru iphe, du l'obu nkiya. Nokwapho g'ọ to dudu onye maru iphe, nọ Chileke l'uche a -gufu Unme Chileke. ¹² Su-a; o to bukwa unme ndiphe be anyi nataru; o kwa Unme, shi l'ẹka Chileke be anyi nataru, bu iya bu Unme, l'e-mekwanu g'anyi makotaru iphe-oma, Chileke meshiru anyi.

¹³ Oo ya bu le-a; l'ọ to bukwa opfu, e gude mmamiphe ndiphe zia anyi be anyi egudeje epfu iphe ono. Iphe, anyi egudeje epfu iya bukwa opfu, Unme Chileke ziru anyi. Oo ya bu g'anyi ewojeru okpobe-opfu, shi Unme Chileke l'ẹka akoru ndu Unme Chileke bu l'ehu g'o doo phe enya. ¹⁴ Onye Unme ke Chileke ta anodu l'ehu ta anatajekwa iphe, shi l'ẹka Unme Chileke; kele iphe ono aduje iya ehueswe ehueswe l'enya. Teme ophu o dojedu iya enya eshinu o to byadu amaru urwu iya me o budu le Unme Chileke, nọ l'ime iya eyeru iya ẹka. ¹⁵ Obenu l'onye Unme Chileke bu l'ehu; amajeru urwu iphemiphe; ophu nemadzụ mmanu adujekwanu ike maru iphe onye ono eme. ¹⁶ Oo ya bu iphe, e deru l'ekwo-opfu Chileke su:

“?Bu onye maru uche
Nnajiuphu, bu Chileke?
?Bu onye be bu onye adu
ike kajeru iya iphe,
oo-me?†”

* 2:9 2:9 Gūnaa Azá 64:4. † 2:16 2:16 Gūnaa Azá 40:13.

O bekwanu l'anyịbedua nweru uche kẹ Kéreshi, bu iya emeje g'anyi ri Ọriri g'ọori.

3

Ndu ejeru Chileke ozi

¹ Unwunna mu; mu ta adukwa ike pfiaru unu opfu, eepfuru ndu Unme Chileke bu l'ehu. Opfu, mu pfuru unu bukwa opfu, eepfuru ndu emekwadu umere ndiphe; mbu ndu bukwa nwaswa l'iphe kẹ Kéreshi. ² Noo g'o gude mu chee unu era; ophu mu ededuru unu nri eshinu unu eshidu sɔwaru k'eriri iya. Mbu le nta-a be unu teke asukpokwaa ya nu; ³ kele unu emekwadu umere ndiphe. Eshinu unu ejikwadu iji-anya; teme unu nodu adzo-phe anya; bya anodu ekpa l'iche iche; ? unu ta amadu l'unu etsokwadu uzo kẹ ndu mgboko-a; l'unu emekwadu umere ndiphe. ⁴ L'eshinu unu atukoje epfugbaa su: “Mbɛdua lakwaru Pɔlu.” Onye ophu asu: “Mbɛdua lakwaru Apɔlosu.” ? Unu ta amadu l'unu emekwadu umere ndiphe?

⁵ Mbu-a; Apɔlosu ono; ?o bu onye? To Pɔlu; ?o bu onye? O to dukwa ndu ozo, anyi bu gbahaa ndu ejeru Chileke ozi; ndu goshiru unu uzo, unu shiru bya eworu onwunu ye Jizosu l'eka. G'anyi ha nwekotaru iphe, Nnajiuphu sɔru g'anyi mee. ⁶ Iphe, anyi meru dukwa g'egube-a, aakuje akpuru oshi-a. O buru mbɛdua be kuru akpuru oshi obu akuku; Apɔlosu gbaa ya mini. O bukwanuru Chileke bu onye meru g'o vua evuvu. ⁷ Oo ya bu l'onye kuru akpuru oshi; me onye gbaru iya mini ta adukwa iphe, ephe pfube buru. O kwa onye bu iphe bu Chileke, bu iya bu onye meru iya g'o vua. ⁸ Onye kuru iphe akuku me onye gbaru iya mini tukokwaru eje ozi lanu. Ole g'ephe ha l'ehu l'ehu be Chileke e-bukwa nggo; onye jeru g'o jeru be oo-bu nggo g'ozi, o jeru gbaru.

⁹ L'ọ kwa Chileke bẹ anyi l'iya tukuru gbaru mgba eje ozi ono. Unubedua bu opfu, Chileke koru bya aburu ulo, Chileke akpu. ¹⁰ Mu gude iphe-oma, Chileke yeru mu l'eka ge mu gude jeeru iya ozi mee iphe, onye maru akpu ulo okpobe akpukpu emeje. Mu turu okpa-ulo; onye ozo nodu akpukwanu ulo obu akpukpu. Ole g'onye akpu g'okpu; letakwa enya maru iphe, okpu l'eli okpa-ulo obu. ¹¹ Noo kele o to dukwa onye ozo, atubaa okpa-ulo ozo abudu ophu a tularu, bu iya bu Jizosu Kereshi. ¹² L'eli okpa-ulo ono be o duru ndu e-gude mkpola-ododo akpu iya ulo; ndu egude ope; ndu egude mkpuma, aswa du; o dukwarupho ndu bu oshi be ephe e-gude akpu nkephe; ndu egude eji; ndu abukpooruro eta be ephe e-gude akpu nkephe. ¹³ Obenu l'oniyemoye be aa-maru g'iphe, o gude kpu nkiya du-be ree mboku ikpe ono, Chileke e-woru iya tua jala onoya. L'oku, e-tsu mboku ono be bu o -tsuchaa; aa-huma ozi, oniyemoye jeru iphu. Oku ono e-tsu iya hua ya ama goshikwanu g'ọ gbaru. ¹⁴ Onye oku ekeduru iphe, o gude kpu ulo l'eli okpa-ulo ono; Chileke ebua ya nggo. ¹⁵ Onye oku keru nkiya; l'oolaaruru iya l'iswi; yebedua l'ishi onwiya b'aa-dzotakwa-a; ole adzota nkiya a-dutabewa g'onye a lofutaru l'oku enwunwu.

¹⁶ ?Unu ta amadu l'unu bu eze-ulo Chileke; le Unme Chileke be bu ebubu l'ime unu? ¹⁷ Onye emebyi eze-ulo Chileke be Chileke e-mebyikwapho. L'eze-ulo Chileke dukwa nsọ; o buru unubedua gededede bu eze-ulo iya obu.

¹⁸ G'ọ to dukwa g'unu ha onye anoduje agho-pheru onwiya ugho. G'onye arị le ya maru iphe l'ogbo owa-a; hakwaa egube oriri ono bya aburu onye-eswe; e-mechaa g'oo-buru onye maru iphe okpobe amaru. ¹⁹ Kele iphe, ndiphe guberu mmamiphe le mgboko-a be bukwa iphe-

eswe l'iphu Chileke. L'e dekwaru l'ekwo-opfu Chileke su: “Ọo Chileke bu onye anmatajẹ ndu kwaru ẹnya lẹ nkwaṁnya phe.”²⁰ A bya edekwaa ya pho l'ekwo-opfu Chileke su: “Nnajiuphu makwaru-a l'egomunggo ndu maru iphe bu mkpokpo iphe.”²¹ Ọo ya bu; g'ọ to dukwa onye e-gudeje nemadzụ aba abaa. L'e -pfujekpoo ya nu epfufu; iphemiphe tukokwaru buru iphe unu iphe unu;²² me Polu-o; me Apolosu-o; mekpoo Pyita-o; mgboko l'ophu; me ndzu me onwu. Iphe nta-a me iphe e-me l'iphu; iphemiphe ono tukoru bukotaru iphe unu.²³ Unubedua tukokwanu bukotaru iphe ke Kereshi; Kereshi bukwanuru ke Chileke.

4

Iphe ndu-ishi-ozu Kereshi egoshi anyi

¹ Su-a; unu te edobejekwa anyi g'anyi bu ndu ozo gbahaa ndu-ozu Kereshi; ndu Chileke yeru g'ephe letajẹ ẹnya l'opfu Chileke ono, bu opfu ophu Chileke shi domia edomi ono. ² Iphe, eele ẹnya iya l'eka onye eleta ndu-ozu ẹnya bu g'ọ buru onye e gude ire iya eka. ³ Mu ta akpakwa ishi l'unu doberu mu nno; ozoo lẹ nemadzụ kperu mu ikpe k'ozu, mu jeru; mbedua l'onwomu ta adukpokwanu teke mu suseru l'ọ waa gẹ mu du; ⁴ o noo kele ọ to dudu iphe, mu humaru onwomu l'ehu, bu iphe, mu a-su l'o noo eka mu shisewaru uzo; ole ọ to bukwa iphe ono goshiru lẹ mu kpefuwaru. Ọo Nnajiuphu bu onye e-kpe mu ikpe. ⁵ Ọo ya bu g'unu ta adushi onye unu a-nodu anmawa ikpe l'ebe 'oko rwu teke aa-nma ikpe; ikpe bu teke Nnajiuphu a-bya; l'o kpee ya. Noo teke oo-wofuta iphe, e shi domia l'ochii bya edobe l'iphoro; l'ọ bya eworu iphe, amadu chiru k'ememe, bu iphe, du iya l'okpoma; woru tua jala. Noo teke Chileke a-ja onyemonye ajaja, rwuberu iya nu.

⁶ Ụnwunna mu; ọ kwa g'e-shi g'o doo unu ọnya bẹ mu gude woru iphemiphe ono dobe l'ẹhu mu lẹ Apọlosu; g'unu anwuta iphe ono, e pfuru sụ: “Unu te etsoghatajẹkwa iphe, e deru l'ẹkwo-opfu Chileke.” Sụ-a; g'ọ tọ dukwa g'unu ha onye egudeje onye lanu eku onwiya; woru onye ọphu nmaa phulaphula. ⁷ Sụ-a; ?bụ onye mekpọoru ngu i ka onye ọzo? ?Bụ g'unu bẹ i nweru 'abudu iphe, Chileke nuru ngu? Eshinu ọ bụ Chileke nuru ngu iya; ?denukwanu g'o gude i gbẹ gude iya eku onwongu g'ọ -bụ l'ọ tọ bụedu iphe, a nuru ngu anunu?

⁸ Ẹpho gbẹ jichaakwanu unu! Unu gbẹkwa nwekọtawaru nụ iphemiphe; bụchawaru nụ ndu eze; ẹbe anyịbedua abudu. Ọ dukwa ree. Ọ gbẹkwanu dū mu g'a sụ l'unu bụchawaa eze ọbu; mẹ anyi abya g'anyi l'unu tuko buru iya. ⁹ Obenu l'ọ dukwa mu g'anyibe ndu-ishi-ozu Kéreshi bẹ Chileke woru dobe l'ikpazu. Anyi nọwaa gẹ ndu e doberu k'apfu-gbu; mbụ g'anyi buru iphe, mgboko mgburugburu, a-byajẹ ahuma ahuma; mbụ ndiphe mẹ unwu-ojozi-imigwe. ¹⁰ Anyi gude opfu ẹhu Kéreshi buru ndu eswe; unubedua gbẹwanu l'ẹka Kéreshi buru ndu maru iphe. Anyi dū arwuhu; obenu l'unubedua gbenu shihu ike! Anyi bụ ndu a nmaru phulaphula; obenu l'unubedua bẹ a gbẹ kwabẹ ùbvù.

¹¹ Sụ-a; ẹgu anọdujekwa agụ anyi; mbụkwa byasu nta-a; ẹgu mini nọdu anọduje agụ anyi; anyi nọdu anma nkirika ẹkwa; a nọdu etsu anyi iphe; anyi tsoru ẹkameka aghaphe; ọphu anyi enwedu unuphu. ¹² Anyi gbẹ gude ẹka anyi ese akanya g'anyi e-meje anu onwanyi nri. Teke a turu anyi ọnu; anyi agoru ọnu-oma nū onye ọbu. A -nọdu akpa anyi ẹhu; anyi ataru iya nshi. ¹³ Teke e pfubyishiru ẹpha anyi; anyi epfuru opfu bebelebe nū onye ọbu; anyi gbẹ bya abụwaru ikpọzu kẹ ndiphe; mbụ iphe, dū ideyideyi, e gude ẹza zafu l'ẹkameka; byasu

l'eswe, dū gẹ ntanū-a.

¹⁴ Iphe, mu ederu unu iphe-a ta abụkwa g'o mee g'iphere dū unu. Ọ kwa ẹka bẹ mu alọru unu lẹ nchi; l'unu bụ ụnwu mu, mu yeru obu. ¹⁵ L'unu - nwechakpọkwaaru m'obeta ọ bụru ụnubuku ndu eleta unu ẹnya l'ụzo kẹ Kéreshi; nna unu ta adụkwa igw-erigwe. Ọ kwa mbẹdua bụ nna unu, nūru unu ndzū, shi l'ẹka Kéreshi; eshinu ọ bụ mbẹdua byaru ezia unu ozi-oma ono. ¹⁶ Noo g'o gude mu nọdu arwo unu arworo sū; jiko unu tso ru ẹka mu. ¹⁷ Ọ kwa iphe ono meru g'o gude mu zia Timoti sū g'ọ byapfuta unu. Timoti ono bẹ eshinu mu ziru iya etso Nnajiuphu bẹ ọ bụwaa nwa mu, mu yeru obu; tẹme ọ bụru onye goshiwaru lẹ ya gbaru gẹ mu gude ire iya ẹka. Sū-a; g'ọ byapfuta unu bya anyatabaaru unu gẹ mu egudeje etso ụzo kẹ Kéreshi ono; mbụ gẹ mu ezije iya l'iphe, bụkpoo Chiochi g'ọ ha l'ekameka.

¹⁸ Ọ dūru ndu gbẹ hawaru nū eku onwophẹ; g'ọ bụ lẹ mu ta abyadū alwabaazū lẹ ndu-unu. ¹⁹ Ọle a taa nọedu ọdu; mu abyapfuta unu; mẹ Chileke kwenu. Noo teke mu a-hūma iphe, ndu ono, eku onwophẹ ono a-dū ike mee; tọo ẹphe bụ ọ-pa-ọnu. ²⁰ L'iphe, bụ lẹ Chileke bụ eze ta abụkwa opfu, eepfu l'ọnu; ọ kwa iphe, gude ike ere ire. ²¹ ?Bū ole ka unu ree? ?Mu gude ẹchachi byapfuta unu? ?Tọo gẹ mu gude obu-iphóró waa ewoze onwonye alị bya?

5

Urwu-alị, harū dū lẹ Chiochi

¹ Sū-a; mu anụkwa l'unubẹ ndu Chiochi harū arwū urwuali. L'ẹjo urwuali, unu harū arwū dū-be ẹji; k'ọphu bụ lẹ ndu 'amadū ekemu Chileke ta atukpodanu ama ememe iya; kẹ gẹ nwoke duta nyee nna iya wata alūlu.

² Unu nọdu ekukwaphọ onwunu; ọ bụru iphe, unu gege agbẹ agụ aphụ. Unu wuchikwaa onye ono ewuchi; g'ọ tọ nọduhekwa l'echilabọ unu. ³ L'a makwaru-a lẹ mu ta anọdu l'ẹka unu nọ ono; k'ọphu unu ele mu ẹnya; obenu l'obu mu nọkwa-a l'ẹka unu nọ. Noo g'o gude mu gude ike kẹ Nnajiuphu anyi, bụ Jizọsu Kéreshi nmaa onye ono, meru ẹbyi ono ikpe g'ọ bụ lẹ mu l'unu nọ l'ẹka ono. ⁴ Sụ-a; unu -nọkobeepho; teke ono obu mu anọdukwapfo l'ẹka ono, unu nọ ono; ike kẹ Nnajiuphu anyi, bụ Jizọsu a-nọdukwapfo l'ẹka ono, anyi nọ ono; ⁵ unu woru onye ono ye Nsetanu l'ẹka g'o mebyia ogwẹhu iya; l'o noo iphe, gbaru iya nụ bụ ono. Ọo ya bụ gẹ Chileke a-dzọo ndzụ iya mbọku, Nnajiuphu a-bya.

⁶ Sụ-a; ekuku, unu eku onwunu ta adụkwa ree. ?Unu ta amadụ l'ọo nwọchileka iphe, ekoje buredi bẹ asụjeru ekoli ishi buredi ophu? ⁷ Unu tọ nwẹhu sashia akahụ iphe-ekoje-buredi ono, g'unu aburu buredi ọphúú, e te eyeduru iphe, ekoje buredi. Noo kẹle nwaturu Ojaghata ono, bụ Kéreshi bẹ e gbuakwaru. ⁸ Nta-a bụakwaa g'anyi wata abọ ọbo-iphe ono g'ọ gbaru. G'anyi te egudekwa buredi ọphu akahụ iphe-ekoje-buredi ono dụ, bụ iya bụ ẹjo-iphe yẹe iphe-ashị gude bọo ya. Ọ kwa g'anyi gude buredi ọphu iphe-ekoje-buredi adudu ililekpọo bọo ya, bụ iya bụ anọdu ndzụ ọphu ntucha adudu ilile waa l'eme ire-lanụ.

⁹ Mu dehaakwaru unu ẹkwo sụ unu g'unu lẹ ndu eme kẹ nwoke mẹ ndu eme kẹ nwanyi te emegbajẹkwa. ¹⁰ Ndu mu epfuru unu ta abụkwa ndu 'amadụ Chileke, eme ẹgube iphe ono; ọzoo l'ọo ndu ẹnya-pfúrurufuru; ọzoo ndu ana nfụ; ọzoo ndu agwọ nshi. Ndu k'ono bẹ unu -jeshia phẹ ezeru; bụanaa iphe, gbaru unu l'ememe bụ g'unu lufuepho lẹ mgboko alufu ophu. ¹¹ Iphe, mu shi epfu bụkwa g'unu bujeru ụbara yeru onye kuru

onwiya nwanna tẹme ọ gbẹ eme kẹ nwanyi; ọzoo eme kẹ nwoke; ọzoo nweru ẹnya-pfurupfuru; ọzoo l'oo gwọ nshi; ọzoo l'oo onye evu onye ọzo nvu azu; ọzoo l'oo onye angugharu mee ẹka; ọzoo onye ana nfu. Ọo ẹgube onye ono bẹ mu sụkwarupho g'unu l'iya te erigbajeshi nri.

¹² Ọ -buru kẹ ndu amadu Jizosu; ?nkemu bu l'ole; k'eje phe anma ikpe? ?Tobudu ndu ophu no l'ime Chiochi bẹ ọ gbaru anyi l'ekpe ikpe? ¹³ Obenu le ndu ophu anodu l'ime Chiochi bu Chileke e-kpe phe ikpe. Ọo ya bu le-a; “Unu chifujekwa onye njo l'echilabo unu.”

6

Agbaru unwunna ekwo

¹ ?Denu g'o gude ọ nodu abujeru teke ọ bu l'o nweru g'unu ha onye opfu adaru yee nwibe iya; l'ọ gbẹ paru iya jepfushia ndu apfubeduru ẹka oto g'ephẹ kpee; ẹphe ta apapfudu iya ndu-nsọ ibe phe? ² ?Unu ta amadu l'oo unubẹ ndu-nsọ bu ndu e-mechaa kpee ndiphe l'ophu ikpe? Eshinu ọ bu unu e-kpe ndiphe l'ophu ikpe; ?unu ta akabedu suru ekpe unwu iphiriba ikpe onoya? ³ ?Unu ta amadu l'oo anyibedua bẹ l'e-mechaa kpee unwu-ojozi-imigwe ikpe? Ọ buchiaru nu opfu k'eliphe bẹ unu ta adudu ike kpeshia. ⁴ Ọ -buru l'egube opfu ono duru unu; ?denu g'o gude unu gbẹ ewotaje iya eje edoru ndu unubẹ Chiochi suru l'ọ to dudu iphe, ẹphe bu? ⁵ Iphe, mu gude epfu iphe-a bu g'iphere iya du unu. ?To dukpoda g'ọ ka mma l'oo onye lanu l'echilabo unu; bu onye maru iphe k'ophu odojeru unubẹ unwunna ono opfu? ⁶ Ọ gbẹ abujeru nwanna -gbeshi l'oo-je agbaaru nwanna iya ekwo l'iphu ndu ta amadu Chileke.

⁷ Agba ekwo ono, unu anoduje agbaru nwibe unu ono buakwaa iphe, du ẹji bẹ unu anoduje emeta ekpu

onwunu. O shitachia ono; ?bụ g'unu kparụ iphe, unu ta adujedu ike taa nshi me e -mee unu eji? ?Tọ kachidaa ree g'ọ buchiaru l'ọo unubedua be onye ọzo gbechia gude ugho emekputa? ⁸ Unubedua l'onwunu gbẹ anoduje eme nwibe unu eji; gude ugho eme nwibe unu iphe, apfuduru-oto; l'eka nwibe unu ono buhukwapho unwunna unu. ⁹ ?Unu ta amadu le ndu apfubeduru-eka-oto be uto aduduru l'eka Chileke bu eze? Unu te ekwekwa g'e duru unu ghaa uto. Ndu urwuali; me ndu agwo nshi; me ndu eri ogori; me onye nwoke araje nwoke ibe iya; ¹⁰ me ndu-oshi; me onye enya-pfurupfuru; me ndu angughajeru mee eka; me ndu evuje nvu azu; me ndu ana nfu; ta adukwa g'ephe ha me onye lanu, abahu l'eka Chileke bu eze. ¹¹ O buru g'unu shi haru duchaa bu onoya. Obenu le Kereshi safuwaru unu iphe-eji unu; bya emee unu ndu ke Chileke, duoberu Chileke ree. O buru l'eka Jizosu Kereshi, bu Nnajiuphu waa l'eka Unme-du-Nso be Chileke shi gua unu le ndu pfuberekoto l'iphu iya.

Ehu ngu l'ophu bu ke Chileke

¹² "Iphemiphe be a haru mu uto ge mu meje g'ọ du mu." O le o to bukwanu iphemiphe be bu mu -mee ya l'ọ duru mu le ree. "A haru mu uto ge mu meje iphemiphe g'ọ du mu." O le mu tee kwekwanu g'ọ duru iphe, e-wota mu mee ge mu buru ohu iya. ¹³ "Nri be e mekwaru g'ọ laje l'epho; bya emee epho ge nri laje iya." O le Chileke e-mechakwanaa tuko ephenebo mebyia. Iphe, Chileke medoru ogwehu ta abukwa g'e gude iya pharwushije onwonye; o kwa Nnajiuphu, bu Jizosu be o medoru iya; teme Nnajiuphu l'onwiya bukwarupho Nnajiuphu k'ogwehu. ¹⁴ Chileke kuliru Nnajiuphu o shi l'onwu teta dzuru ndzu; o bukwarupho nno bu g'oo-gude ike iya kulia anyibedua.

¹⁵ ?Ọ dū g'unu ta amadū l'ogwēhu unu bụ mpfukata ẹhu Kéreshi? ?Denu gẹ mu a-gbẹ wota mpfukata ẹhu Kéreshi jeye l'ẹhu nwanyị ụkpara? Tụswekwa!
¹⁶ ?Unu ta amadū l'onye jepfuru nwanyị ụkpara bẹ yẹ l'iya tūgbawaru bụru onye lanū? Eshinu e pfuru sū: “Ephenebo l'a-būru onye lanū.” ¹⁷ Obenu l'onye yẹ Nnajiuphu, bụ Jizosụ tūgbaakwanaru bẹ yẹ l'iya bụakwapho onye lanū lẹ Unme Chileke.

¹⁸ Unu buru ụbara yeru apharwūshi onwonye. Iphe, bụkpoo iphe-ẹji ọzo, eemekpọo ememe ta adụkwa ọphu emebyi anụ-ẹhu nemadzū; obenu l'onye apharwūshi on-wiya l'emebyi anụ-ẹhu iya. ¹⁹ ?Unu ta amadū l'ogwēhu unu bụ eze-ụlo kẹ Unme-dū-Nsọ ono, bu l'ime unu ono; mbụ Unme-dū-Nsọ ono, unu natarū l'ẹka Chileke ono? Noo g'o gude ẹbe ọ bụedu unu, nwe onwunu. ²⁰ Unu bụwaa aswa, Kéreshi zūru azūzu. Ọo ya meru g'o gude unu je l'egude ogwēhu unu ekutse Chileke.

7

A bya lẹ k'alụ nwanyị

¹ A bya abya lẹ k'iphe ono, unu deru mu l'ẹkwo-ozī ono. Iphe, dū ree bụkwa gẹ nwoke te ejejeshi alụ nwanyị. ² Ọ bụwaa g'o to me g'amadū wata eme kẹ nwanyị meru g'o gude mu sū: gẹ nwoke l'ẹhu l'ẹhu lūtaje nwanyị k'ẹka iya; nwanyị nọnu eje aluru ji k'ẹka iya. ³ Gẹ nwoke lajẹru nyee ya l'ụlo g'ọ gbaru iya eshinu ọolu iya alulu. Nokwaphọ gẹ nwanyị a-lajẹru ji iya l'ụlo g'ọ gbaru iya l'ọo ya bụ ji iya. ⁴ Lẹ nwanyị, aalụ alulu te enwekwa ẹhu iya. Ọ kwa nwoke nwe ẹhu nyee ya. Nokwaphọ g'ẹhu kẹ nwoke 'abụkwa iya phọ nwe iya. Ọ kwaphọ nwanyị nwe ẹhu ji iya. ⁵ Gẹ nwoke ta ajikajekwa ejepfu nyee ya; ọphu nwanyị ajikajekwa ji iya; gbahakwa l'unu chīru iya achīchi sū l'ọo g'unu haa onwunu kẹ nwateke ono;

k'ophu unu e-woru uche dobe l'epfu anu Chileke okpobe epfufu. O le teke unu tuburu k'epfu anu Chileke obu bvũekwapho; unu watakwa akwakwa ozo; o -nonyakwaa Nsetanu kwaru unu ye l'iphe, du eji opfu l'unu ta adudu ike esede onwunu.

⁶ O le iphe-a, mu epfuru unu-a bukwa ke le mu kwetaru g'o du egube ono; o to bukwa l'oo ekemu, a turu atutu dobe. ⁷ Le mu -jeshia epfufu; bukwa iphe, dukporo mbɛdua ree bu g'a su l'oniyemonye du-dzuru ge mu du-a; obenu l'oniyemonye nwekotaru iphe-oma, du iche, Chileke seru ye iya l'eka; onye nkiya adu egube-a; onye ophu nkiya aduro g'oo-du.

⁸ Su: o -buru ke ndu ta aludu ji me ndu ta aludu nwanyi; me unwanyi ophu ji phe anodedu; ndu k'ono be iphe, mu epfuru phe bu l'o duru phe ree g'ephe noduepho ta aluhe ji; ebe nwoke aluhe nwanyi; nodu ge mu no-a. ⁹ O le o -buru l'ephe taa dudu ike emekota iya; ge nwoke lukwaa nwanyi; ge nwanyi lukwaru ji. L'ono kakwapho mma eme l'anodu taahaa nshi okpehu l'iphe, agushi phe ike.

¹⁰ O be le ndu ophu aluwaanu be mu aturu ekemu su; ge nwanyi b'adukwa teke oo-lufuje libe ji iya. Mbũ l'o to bukwa mu atu ekemi obu; o kwa Nnajiuphu anyi, bu Jizosu. ¹¹ Teke o bukwanu l'o lufuru; ge nwanyi obu kwakwaa b'alu ji ozo; odumeka g'o laphukwa azu ge ye le ji iya doshia. Ge nwoke ta adukwa teke oo-chifuje nyee ya.

¹² A bya le ndu ophu phoduru nu mu su-a; owa-a bukwa mu epfu iya; o to bukwa Nnajiuphu; teke o bu l'onye kweru ke Kereshi alu nwanyi, te ekwedu ke Kereshi; g'onye ono ta achifukwa iya me o -buru le nwanyi obu kweru-a le ye l'iya a-tuko-a nodu alu. ¹³ O -bukwanuru l'oo nwanyi, kweru ke Kereshi alu nwoke,

ekwedu kẹ Kéréshi; gẹ nwanyị ọbu ta alufukwa l'ibe ji iya ọbu; mẹ ọ -bụru lẹ nwoke ọbu kweru-a lẹ yẹ l'iya a-nọdu alu. ¹⁴ Kẹle nwoke, ekwedu kẹ Kéréshi bya alu nwanyị, kweru kẹ Kéréshi bẹ shiakwaa l'ẹka nyee ya bụwaru kẹ Chileke. Nokwaphọ gẹ nwanyị, ekwedu kẹ Kéréshi bya alu nwoke, kweru kẹ Kéréshi shiakwaphọ l'ẹka ji iya bụwaru kẹ Chileke. Ọ -bụ l'ọ tọ dū nno mẹ unwu unu phẹ abụjeru ndu aasọ nsọ; obenu lẹ nta-a bẹ ẹphe dukota nsọ. ¹⁵ Teke ọ bụ l'onye ọphu ekwedu kẹ Kéréshi bẹ sūru lẹ ya ta alūedu; g'ọ hakwaa. Onye nwoke ọzoo nwanyị kweru kẹ Kéréshi ono bẹ e tee kebutaekwa ekebuta; eshinu Chileke kuru anyi g'anyi buru lẹ nchị-ọdu-doo. ¹⁶ Mbụ-a; gūbe nwanyị, alu ji; ?denu g'ishiru maru l'e tee shidu ngu l'ẹka dzọo ji ngu? Tọo ?denu gẹ gūbe nwoke meru maru l'e tee shidu ngu l'ẹka dzọo nyee ngu?

Aadu gẹ Chileke doberu onye

¹⁷ Ọo l'ẹpho g'onyenonu mejeephọ iphe, Chileke keru nū iya g'o meje; mejekwa iya phọ gẹ Chileke sūru g'o meje iya teke o kuru iya. Ono bụ ekemu, mu atū edoberu iphe, bụkpoo Chiochi, nọ l'ẹkameka. ¹⁸ Mbụ l'iphe, mu epfu bụ; g'onye buru úbvù tẹme e kua ya te ejeekwa eme onwiya onye e buduru úbvù. G'onye ebuduru úbvù te ejeekwa ebụ úbvù. ¹⁹ Kẹle e buru úbvù l'e te ebuduru te enwedu iphe, ọ bụ l'iphu Chileke. Iphe, bụ iphe bụ g'e meje iphe, Chileke karu sū g'e meje. ²⁰ Ọo ya bụ g'onyenonu dūjeephọ g'ọ dū teke Chileke kuru iya. ²¹ Teke ọ bụ l'ị bụ ohu teke Chileke kuru ngu; ta ayọekwa ọshi. Gbahakwa l'ị maru ụzo, ii-shi gbaa onwongu; g'i menaa ya nweru onwongu. ²² L'onye Chileke kuru; ọ bya yẹ Kéréshi bya atugba; teke onye ono bụ ohu; g'onye ono nyatakwa lẹ Nnajiuphu tọwaru iya l'ẹgbu,

iphe-ẹji keru iya. Nokwapho g'onye 'abudu ohu teke Chileke kuru iya byawaru bya aburu ohu Nnajiuphu, bu Kereshi. ²³ Unu buakwaa aswa, Kereshi zuru azuzu. Oo ya bu; unu ta laekwaazu je aburu ohu ke ndu mgboko-a. ²⁴ Unwunna mu; g'onyenonu jiko dujeekwapho g'o du teke Chileke kuru iya; g'onye ono nduakwaro l'atugba, yele Chileke tugbaru.

Ndu ata aludu alulu

²⁵ A bya l'ehu k'unwanyi, ata aludu ji me unwoke, ata aludu nwanyi; o to dudu ekemu, mu a-su le Nnajiuphu turu doberu unu. Obenu le mu e-ye onu, rwuberu mu nu; eshinu e shiwa l'obu-imemini ophu Chileke aphuru mu; mu buru onye goshiwaru l'o gbaru g'unu gude ire mu aka.

²⁶ Oo ya bu l'iphe, mu arikuwa bu le ge mkpawere habe shii nta-a be iphe, kakwa ree bukwa g'onyenonu nduerupho onwiya g'o no. ²⁷ Teke iluwaa nwanyi; ta achifukwa iya. O bukwannuru l'i ti luda nwanyi; te jeekwa aluta. ²⁸ Ole o to bukwa eme iphe-ẹji me i - je alua nwanyi. Teke o bukwanu le nwamgboko jeru je alua ji; o to bukwa iya pho eme iphe-ẹji. O kwa l'iphe, o bu bu le ndu alu nwanyi me unwanyi, alu ji be vu iphe-ehuka ke mgboko-a l'ishi. Ophu o dukwanu mu g'a su l'unu dabaru l'iphe-ehuka, du nno.

²⁹ Mbụ l'iphe, mu epfu unwunna mu; bu le mboku abvukwa. Ge ndu alu nwanyi shiepho nta-a metajekpooro g'ephe ta aludu nwanyi. ³⁰ Ge ndu aphu tsoru metajekpooro g'o to dudu iphe, atsụ phe l'ehu. Ge ndu ehū atsọ utso mejekpooro g'ehu ta atsodu phe. Ge ndu nweru aswa, ephe azu metajekpooro g'o to dudu iphe, ephe azu. ³¹ Teme ge ndu emekpo iphe, ephe eme

lẹ mgboko-a metajekpooro g'ọ tọ dudu iphe, iphe ono bu. Lẹ mgboko-a, dudu g'ọ dudu-a ta aduekwa g'ọo-nọ-beru.

³² Oke iphe, mu eme gẹ mu karu unu bu g'unu haa ayọ-phe oshi. Iphe nwoke, ta aludu nwanyi a-nodu epfu buepho gẹ ya e-me jeeru Nnajiuphu, bu Jizosu ozi, bu iya bu gẹ ya e-me meje iphe, jiru Jizosu epfo. ³³ Obenu l'onye alu nwanyi be l'ayo oshi iphe mgboko, bu iya bu gẹ ya e-me meje iphe, jiru nyee ya epfo; ³⁴ shi nno chita iphe labo ari. Nokwapho gẹ nwanyi, ata aludu ji me nwamgboko, ta aludu ji du bu onoya; iphe, ephe eyejeru eh bu bukwapo g'ephe e-me jeeru Nnajiuphu ozi; g'ephe e-me wota eh phẹ me oriri phẹ doberu Chileke iche. Obenu lẹ nwanyi, alu ji be iphe, ooyo oshi iya bu oshi iphe mgboko, bu iya bu gẹ ya e-me mee iphe, jiru ji iya epfo.

³⁵ Su-a; iphe, mu gude epfu iphemiphe-a bukwa lẹ mu eme gẹ mu yeru unu eka. Mu te emekwa gẹ mu sede unu. O chikwaa iphe, mu eme bu gẹ mu mee g'unu meje iphe, pfuru nhamunha, gbaru unu l'ememe; g'ọ tọ dudu iphe, a-nafuje unu egomunggo l'eje ozi Chileke ono.

³⁶ Teke o bu lẹ nwoke, eje alu nwanyi nonyaru bya emeahaa umere egoshi lẹ nwanyi ono agushikpowa iya ike; teme nwamgboko ono kajiwaa akaji; o duwaa nwoke g'ọ lu ya; be o dukwa ree g'ephe lu. O tọ bukwa iya eme iphe-aji. ³⁷ Obenu onye obu shihuru ike; o gude obu iya pfua ya pfushia ya ike lẹ yee ya taa kwadu; kele o maru l'ọ tọ tsudu iya l'eh; l'ọo-dua ike sede onwiya; o tọ dukwa eji me onye obu nodu; ebe yele nwanyi obu akwadu. Onye ono mekwaru ree. ³⁸ Oo ya bu l'onye luru nwanyi meru ree. Onye aluduru iya nu kabakwaro eme ree.

Nwanyi, ji iya anohedu

³⁹ Nwanyị, aalụ alụlu bẹ́ jì iya nwekwa enwenwe mẹ́ jì iya -nọ́dukwadu ndzụ́. Mbọ́ku, ọ́ nọ́nyawaru jì iya nwùhu; e -shi mbọ́ku ono bẹ́ ọ́ tọ́ dùhedu iphe, gude iya g'ọ́ to je alùru onye dù iya ree. Ọ́le g'ọ́ lùkwaa onye kẹ́ Kéreshi. ⁴⁰ Obenu l'ẹ́hu gege aka iya atsọ́ ụtso ọ́me ọ́ harù alù jì ọ́zo. Nokwa gẹ́ mụ́be Pọ́lu yeru ọ́nu bụ́ ono. Mu nọ́du arikwa lẹ́ Unme Chileke bukwa mu phọ́ l'ẹ́hu.

8

Eri iphe, a gwarù iphe

¹ Ọ́nu, mu yeru lẹ́ k'iphe, a gwarù iphe bụ́ lẹ́-a; l'a makwarù-a l'unu sùru l'anyi tùkoru maru iphe. Ẹ́gube mmamiphe ono emejekwa nemadzù g'ọ́ ku on-wiya; obenu lẹ́ n-yemobu anọ́duje emetse emetse. ² Teke ọ́ bụ́ l'ọ́ dùru onye arije lẹ́ ya maru iphe; onye ono teke amarwukwa iphe g'ọ́ gbaru iya l'amama iya. ³ Obenu l'onye yeru Chileke obu bẹ́ Chileke maru.

⁴ A bya lẹ́ k'eri iphe, a gwarù iphe mu sù; iphe, anyi makpọ́adaru bụ́ l'ọ́ tọ́ dùdu iphe, bụ́ iphe, aagwa agwagwa mẹ́ ilile dùru iphe, ọ́ bụ́; mbù l'ọ́ bụ́kota okorophoo iphe. Anyi makwaruphọ́ l'ọ́ tọ́ dùedu Chileke ọ́zo, dù nù gbahaa Chileke lanù ono kpoloko. ⁵ Kẹ́le ọ́ dùchakpooru nù igwerigwe iphe, eeku agwa, nọ́ l'imigwe ọ́zoo l'eliphe; g'iphe, e dobegbaaru abarù ẹ́ja dúnnaa igwerigwe; tẹ́me ndu ọ́phu ekuru nnajiuphu dükwaphe igwerigwe; ⁶ obekwanu l'iphe, anyị́bedua makaharù bụ́ lẹ́ Chileke dù nanù kpoloko kpẹ́ekpu, bụ́ iya bụ́ Nna, onye iphemiphe shi l'ẹ́ka; tẹ́me ọ́ bụ́ru iya bụ́ onye anyi nọ́-doru ndzù. Ọ́ bụ́kwarupho Nnajiuphu lanù kpoloko dù, bụ́ iya bụ́ Jizọ́su Kéreshi; onye bụ́ iya bẹ́ Chileke gbẹ́ l'ẹ́ka iya mee iphemiphe; tẹ́me ọ́ bụ́kwaru iya phọ́ bẹ́ anyi shi l'ẹ́ka iya nọ́du ọ́kpobe ndzù.

⁷ Ọle unu maru l'ọ tọ bụdu onyemonye marwuru iya egube ono. Ndu ọphu egomunggo phẹ dū l'agwa ono mbụkwadua ntanu-a; l'erikwadū iya l'ẹphe eri iphe, agwaru iphe. Iphe ono, ẹphe eri ono emerwushia phẹ egomunggo; kẹle ẹphe te ekweshiduru ike. ⁸ Ọ tọ bụkwa nri l'e-me g'anyi kabaa akpịritaru Chileke ntse. ?Anyi riru iya-o; ?anyi te eriduru iya-o; anyi taa kakwa ẹji; ọphu anyi a-kakwa ree l'iphu Chileke.

⁹ Ọo phọ g'unu kwabẹ ẹnya g'enweru onwonye unu ono ta aburu ọpfu dū ndu ọzo l'ọkpa, bụ ndu ọphu ekweshiduru ike. ¹⁰ Kẹle ọ -buru l'onye ekweta iya eshihūduru ike hūmaru gūbe onye ekweta ngu shihūru ike l'ẹka ị nọ l'ulo agwa eri iphe, agwaru iphe; ?tị madu l'ị gbẹ eyeru iya ọkpu-ikike g'o je asẹe ya onwiya asẹe wata eri iphe ono, a gwaru iphe ono? ¹¹ Ọ n'iya bụ onye ono, ọkpobe-ọpfu ono teke eshihudu ike l'ọkpoma ono eshi l'amaru iphe, ị maru laaru onwiya l'iswi; mbu nwanna ngu ono, Kéreshi nwuhuru l'iswi ẹhu iya ono. ¹² Ọo ya bụ lẹ teke unu meru egube ono bẹ unu meswewaru unwunna unu; opfu l'unu mekaru phẹ iphe l'obu phẹ ono, dukwadu nyegenyege ono. Ọ kwa iya phọ bụ l'unu shiwaa l'ẹhu unwunna unu ono meswee Kéreshi l'iphe ono, unu meru ono. ¹³ Noo g'o gude mu sụ: o -shita g'iphe eri l'ọnu kpata gẹ nwanna mu mee iphe-ẹji; mu ebuchiẹpho ata anu lẹ phuruphuru gberegedege gẹ mu ta akporu iya ọkpa ye l'eme iphe-ẹji.

9

Iphe, rwuberu onye ishi-ozu

¹ Sụ-a mbẹdua; ?mu ta abudu onye-ishi-ozu bya aburu onye nweru onwomu; bya egudekwaphọ ẹnya mu hūma Jizosụ Kéreshi, bụ Nnajiuphu anyi? ?Tobudu unu bụ iphe, egoshi ozi, mu nọ l'ẹka Nnajiuphu anyi ono

jee? ² Mu 'abudu onye-ishi-ozì Jizõsu l'ènya ndu õzo; mu aburu iya nu unubèdua. Oo unubèdua bu iphe-õhubama, egoshi lè mu bu onye-ishi-ozì Nnajiuphu; opfu l'unu byawaru bya aburu ndu ephe lè Nnajiuphu tugbaru buru nanu.

³ Wakwa õnu, mu eyejeru ndu epfu l'iphe, mu eme ta abudu iya baa: ⁴ Mu asuje phe: ?To rwubeduru mu g'aanuje mu nri waa iphe, aangũ angũngu k'ozì, mu eje? ⁵ ?Tõ gbaduru mu eme gè ndu-ishi-ozì õzo; mbu eme g'unwune Nnajiuphu phe; mè Pyita phe? Mbu l'õ gbaru gè mu ga luta nwanyi, etso uzo kè Kèreshi dujeru eje èka mu ejekpõ. ⁶ ?Buepho mu lè Banabas kpoloko bè l'e-seje akanya nri, anyi e-rije nõdu ndzu tõ? ⁷ ?Bu onye ojõgu gũnu jejeru õgu apfu onwiya ugwo? ?Bu onye kõjeru opfu vayinu; õ haa eri akpuru, shi iya nu? ?Bu onye dobejeru aturu õphu o ridu iphe, shi iya nu?

⁸ ?O du unu gè mu epfu iphe-a kèlè õo iphe, ndiphe epfufe? ?Tõo ta atukwaru iya phõ l'ekemu? ⁹ Noo kèlè e deru iya l'èkwo ekemu, Chileke turu nu Mõsisu su: "Unu te ekechijekwa eswi õnu mè unu mee ya õ nõdu azõshiru unu eswa l'ereshi." ?O du unu g'õ bu eswi bè Chileke ayõ õshi iya ono? ¹⁰ O bukpwaa opfu ehũ anyi bè oopfu ono. Oo anyi bè e dedoru iya. Kèlè onye akõ opfu anõduje akõ iya ele ènya iphe, o-meta l'èka ono. Onye echishi eswa l'iphe, õ kõru anõdujekwapho echishi iya tõgbo ènya l'iphe, o-metakwa iya phõ. ¹¹ Anyi kũwaru iphe-õma, shi l'èka Unme Chileke l'echilabõ unu g'aakuje akpuru-iphe l'ègu-a. ?O bu iphe, paru èka mè anyi -shi unu l'èka kpatajè iphe, eele l'ènya rije nõdu ndzu? ¹² Eshinu õphu unu agbèje kwe l'o rwuberu ndu õzo g'ephe rita iphe l'èka unu; ?tõ kachidaa anyi erwube g'anyi rita?

O dũchakpoo nno; õlè mu teke atũ-swee ya ama

ememe. Ọ chia iphe, mu emejechia bụ nshi bẹ mu atagbuje iphemiphe g'eeshi gẹ mu ta agbẹ egbuchi ụzo ozi-oma kẹ Kéreshi. ¹³?Unu ta amadu lẹ ndu eje ozi l'eze-ulo Chileke bụ nri shi l'eze-ulo Chileke bẹ ẹphe erije? Ndu eje ozi l'oru-ngweja Chileke nọdu eketajekwapho iphe, e gude gwaa Chileke. ¹⁴Nokwapho gẹ Nnajiuphu tūru ekemu sū gẹ ndu ezi ozi-oma riye iphe, shi l'ozi-oma, ẹphe ezi.

¹⁵ Obenu lẹ mu teke aji-swee unu aji iphe, dū ẹgube ono. Ọphu ọ bukwa l'ekwo-ozia, mu ederu unu-a bu lẹ mu sūru l'iphe ono rwuberu mu nta. Mbū-a; ọ kachikwa mu ree lẹ mu nwuhuru; eme l'o nweru onye meru g'aba ono, mu abaa ono, būru mkpọkoro opfu. ¹⁶ Unu maru l'iphe, mu anọduje aba l'abaa ta abukwaa lẹ mu ezi ozi-oma ono. Ezi ozi-oma bukwa iphe, mu mefutaje. Nshio mu mẹ mu eziduru ozi-oma ono! ¹⁷ Ọ -būru lẹ mu tūru obu mu onyo ezi ozi-oma ono; bẹ obunggo iya rwubekwaru mu. Obenu lẹ mu eje iya kẹle ọ bụwaa ozi, e yeru mu l'eka. ¹⁸?Bū gūnu bụ mu obunggo iya nta? Iphe, bụ mu obunggo iya bụ lẹ mu anọduje ezi ozi-oma ono; mu ta anatadu aswa iya, bụ iya bụ iphe, gbaru mu l'ememe l'ozi ono, mu ezi ono.

¹⁹ A makwaru-a l'ọ tọ dudu nemadzu, aturu mu iphe, mu e-me; ọle mu gudewaa ẹka mu mee onwomu ohu onyemonye; g'eeshi gẹ mu gude ozi-oma ono kabaa epfubuta igwerigwe nemadzu. ²⁰ Mu lẹ ndu Jiu nọdu; mu emeahaa umere ndu Jiu; g'eeshi gẹ mu pfubuta ndu Jiu. Mu lẹ ndu gude ekemu buru nọdu; mu emeahaa g'onye gude ekemu buru; k'ọphu mu e-pfubuta ndu gude ekemu buru. ²¹ Mu lẹ ndu ete pfudu k'ekemu nọdu; mu ahaekwapho k'ekemu; egudekpọoro l'a ta haduru mu gẹ mu b'e mee iphe, ekemu Chileke pfuru; obenu lẹ mu gude ekemu Kéreshi buru; g'eeshi gẹ mu pfubuta

ndu ete epfudu k'ekemu. ²² Mu lẹ ndu ekweta phẹ dũ nyẹgenyeye nọdu; mu abũru onye ekweta iya dũ nyẹgenyeye g'eeshi gẹ mu epfubuta phẹ. Oo ya bũ l'iphe, bũkpoo iphe, onyemonye bũ; mu abũekwarupho iphe ono gẹ mu eshi nno dũ ike pfuta ndiphe yeru Kéreshi g'ọ dzọo phẹ.

²³ Iphe, mu gude emekọtakpoo iphe ono bũ lẹ mu ese iswi ozi-oma ono; g'eeshi gẹ mu ayĩru l'iphe-oma, dũ iya nũ. ²⁴ ?Unu ta amahaadaa l'a -nọdu agba ọso bẹ a tũkoje agba iya; ọle ọo onye lanũ kpẹekpu emechajẹ nata obunggo ọso ọbu? Oo ya bũ; g'unu kukebe ẹhu gba ọso ono g'unu abũru ndu a-nata obunggo iya. ²⁵ Onyemonye, bũkpoo onye akwakọ atũ ẹgo ọso l'ekukebeje ẹhu esede onwiya l'iphemiphe, oome. Iphe, oosedede onwiya ono bũ g'ọ nata obunggo, dũ l'ọso ono; mbũ obunggo ta adũdu g'ọo nọ-beru l'o mebyishihu. Obenu l'anyibe ndu etso Kéreshi esedeje onwanyi g'anyi anata obunggo ọphu a-nọwaro jasũ lẹ tuutuutuu lẹ mĩimimii. ²⁶ Noo iphe, meru g'o gude mu nọdu agba gẹ mu gbarwua ẹka a kparũ mu oke gẹ mu gbarwua. O bũkwarupho iphe ono meru g'o gude ọphu mu etsudu ẹka g'onye etsu phẹrephere ẹka. ²⁷ O chia iphe, mu emeje bũ lẹ mu etsuje onwomu iphe; tsushia ya ike k'ọphu mu e-sede onwomu ọkpobe esede; g'ọ tọ bũru mu -pfutachaa ndu ọzo yeru Kéreshi; e-mechaa mu a-gbẹ bũru onye ọphu Chileke a-jĩka ajĩka.

10

Anma ọkwa

¹ Sũ-a; ụnwunna mu; unu nyatajẹkwa g'ọ nwũru nna anyi oche phẹ. Lẹ g'ẹphe hakọtakpoo bẹ nọkotaru lẹ mkpula urwukpu ono. G'ẹphe ha jekọta ije l'alị ọkponku ono gude ghaa eze mini ono. ² G'ẹphe ha bẹ Chileke gude urwukpu ono waa eze-ẹnyimu ono mee baputizimu

g'ẹphe b̄uru ndu etso Ḿosisu. ³ G'ẹphe ha rikotaru ̄udu nri lan̄u ono, shi l'imigwe ono ⁴ bya angukotakwapho mini ono, shi l'ẹka Unme Chileke ono. Kẹle ẹphe nguru mini, shi lẹ mkpuma ono, a ta humajedu l'ẹnya ono. Mkpuma ono b̄u iya b̄u Kéreshi. O b̄uru mkpuma ono bẹ tsoru phẹ n̄u ono. ⁵ Oo l'ọobu; ndu ọphu mechaaru mee iphe, ejiduru Chileke ẹpho mechakwaaru ka shii. Ndu k'ono bẹ ishi phẹ tuphashihururo teke ẹphe noro l'echiegu.

⁶ S̄u-a; iphemiphe ono tukokwaru b̄uru iphe, alọ anyi ẹka lẹ nchi g'anyi gude kwaa ẹnya; g'egu eme ẹjo-iphe ta agujeshi anyi g'ọ guru ndu ono. ⁷ Unu ta agwajekwa iphe; l'ọ kwa g'ẹphe haru mee teke ndiche ono, b̄u iya b̄u iphe, e deru l'ekwo-ọpfu Chileke s̄u: “Ndu Ízurẹlu doru eri nri; bya angu m̄e; emechaa ẹphe wulihu meahaa ẹmereme.” ⁸ G'anyi te ejekwa eme kẹ nwan̄yị ọzoo kẹ nwoke g'ẹphe hakwarupho mee; e mechaa unu unu nemadzu ukporo labo l'iri l'esaa l'umadzu ukporo iri nwushihukota l'akpuru ẹnyanwu lanu. ⁹ Ọphu anyi ahukwa Nnajiuphu ama, b̄u iya b̄u g'ẹphe haru h̄u ya teke ndiche ono; agwo tagbushia phẹ. ¹⁰ Ọphu unu agujekwa aphu; g'ẹphe hakwarupho gua ono; ojozi-imigwe b̄u O-gbu-nemadzu, shi l'ẹka Chileke bya eworu phẹ gbushia.

¹¹ S̄u-a; iphemiphe-a mekotaru l'ẹhu phẹ g'ọ b̄uru iphe, e gude anmaru anyi okwa; teme e deshia ya l'ekwo g'ọ b̄uru iphe, e gude ezi anyi iphe; mbu anyibe ogbo ọwa-a, b̄uwaa teke iphemiphe e-meẹbekota-a.

¹² Oo ya b̄u; g'onye riru lẹ ya pfushiru ike pfukwaru kwabẹ ẹnya; a -nonyaa ọ daa! ¹³ L'ọ to dukwa ọhutama, byapfutajewaru unu, 'abudu egube ọhutama, abyapfutajekwapho ndu ọzo. Obenu lẹ Chileke b̄u onye emeje iphe, ọ s̄uru l'oo-me. O to kwedu g'a h̄u unu

ama huğhata iya g'ike unu ha; o chia le teke aahu unu ama ono be oo-goshikwapho unu uzo, unu e-shi nahu ohutama ono. Oo ya bu g'unu adu ike tagbua ya le nshi.

¹⁴ Noo ya bu le-a; ndu mu yeru obu; unu nahu egwe eja. ¹⁵ O kwa opfu, eepfujeru onye nweru egomunggo be mu epfuru unu-a. Unu leanaro enya l'iphe ono, mu epfu ono. ¹⁶ Okoro onu-oma ono, anyi tukoru ago anyata nri Nnajiuphu ono, bukwaphe iphe, anyi ekele Chileke ekele iya ono; ?to budu mee Kereshe be anyi gba mba l'okoro ono? To; buredi ono, anyi awashije ata ono; ?to budu ehu Kereshe be anyi tukokwarupho gbaru mba ono? ¹⁷ Eshinu o bu buredi lanu du be anyi tukokwaru buru ehu lanu; obeta o buru l'anyu du igwerigwe; eshinu anyi tukoru erigba buredi lanu ono.

¹⁸ Unu leanaro iphe, ndu Izuruemeje. Iphe, bu ndu taru anu ono, e gude bya egweeru Chileke ngweja l'oru-ngweja ono; ?ephe ta abuada ndu eje ozi l'oru-ngweja obu? ¹⁹ ?Bukwanu gunu be mu eme ge mu pfua? ? Bu l'o duru iphe, obu mbu iphe, aagwa agwagwa; ozoo iphe, a tushiru l'iphe to? ²⁰ Waawakwa! Iphe, mu epfu bu kwa le ngweja, ndu ta abudu ndu Izuruemeje bu obu be ephe egweru iya. O to budu Chileke. Ophu mu ekwekwanu g'unu l'obvu tugba buru nanu. ²¹ Unu ta abywa l'a-nodu angu iphe, shi l'okoro ke Nnajiuphu bya angukwapho ophu shi l'okoro k'obvu. Nokwapho g'unu ta abyadu l'a-nodu eri nri le teburu ke Nnajiuphu bya erikwapho le teburu k'obvu. ²² ?Anyi agbe kpata Nnajiuphu eko okophoo? ?O du unu g'anyu ka Chileke ike?

Eme iphe m'obvu nwune ngu

²³ Iphemiphe be a hakwaru uzo g'e meje; ole o to bukwanu iphemiphe bu e -mee ya l'o duru onye meru iya

nụ lẹ ree. A hakwaru ụzọ g'e meje iphemiphe; obenu l'ọ tọ bụdu iphemiphe l'emetseje onye eme iya nụ emetse. ²⁴G'ọ tọ dukwa onye anọdu achọ iphe, a-duru iya lẹ ree. G'onyenonu chọjechia iphe, a-duru ndu ọzo lẹ ree.

²⁵ Iphe, bụkpoo anụ, ị zuru l'aswa; tajęe ya phọ; te ejekwa akpa ishi ęka o shi; g'obu etee jedu ngu anma ikpe. ²⁶“Lẹ mgboko l'ophu; mę iphe dukota iya nụ; bụkotakwa kę Nnajiuphu, bụ Chileke.”

²⁷ Teke onye te ekwedu kę Kéreshi ziru ngu lẹ nri; i kweta l'ii-je; riękwapho iphemiphe, e doberu ngu g'i ria. B'ajikwa aji; m'obvu obu anma ikpe. ²⁸ Obenu ọ -buru l'ọ duru onye tufuru onu sụ ngu: “Iphe-a bụkwa iphe, a gwaru iphe”; te erikwa iphe obu; m'obvu onye ono, pfuru ngu iphe onoya; mękwapho m'obvu obu anma ikpe. “Kęle eliphe l'ophu mękpoo iphemiphe, nọkota iya nụ bụkotakwa kę Nnajiuphu.” ²⁹ Obu anma ikpe mu epfuru ta abụkwa nkengu; ọ kwa k'onye ono. Kęle-a; ?bụ obu anma ikpe k'onye ọzo; l'e-me gę mu ta atusaru ęhu? ³⁰ Eshinu mu ekeleje Chileke ekele mę mu -bya eri nri; ?denuhunu g'ọ gude ọ buru iphe ono, mu keleru Chileke ekele tęme mu rije iya ono bę aa-gbę epfubyishi mu.

³¹ Ọo ya bụ; m'obeta unu ria nri-o; ọzoo l'unu nguru iphe, aangụ angungu-o; ọzoo iphe, bụkpoo iphe, unu meru; unu meje iya g'ọ buru iphe, unu gude aja Chileke ajaja. ³² G'ọ tọ dukwa onye aburu upfu du onye ọzo l'okpa; m'ọ bụ onye Jiu; m'ọ bụ onye abudu onye Jiu; m'ọ bụ Chiochi kę Chileke. ³³ Ọo phọ gę mu emeje bụ g'unu e-meje; mbụ gę mu anọduje eme gę mu mee iphemiphe g'ọ du onyemonye ree. Mu ta achọjedu iphe, a-duru mu lẹ ree; gbahaa iphe, a-duru ikpoto ndu ọzo lẹ ree g'eeshi g'a dzọo phę.

11

¹ Ọo ya bụ; g'unu tsoje ẹka mu gẹ mu etso ẹka Kéreshi.

Ekpuchi iphe l'ishi abarụ Chileke ẹja

² Mu ajakpọo unu ajaja ụnwunna mu; l'unu anyatajẹ mu tekenteke; tẹme unu gudeshia iphe ono, Chiochi ezije ono; g'e yeru mu iya l'ẹka mu bya ezia ya unu. ³ Ọle iphe, mu eme g'unu makwaruphọ bụ l'ọo Kéreshi bụ ishi iphe, bụkpoo onye nwoke; nwoke bụkwanuru ishi kẹ nwanyị, ọolu alulu. Ọ bụkwanuru Chileke bụ ishi kẹ Kéreshi. ⁴ Nwoke, epfu anụ Chileke; ọzoo l'oopfuchiru Chileke; bya ekpuru okpulishi; bụkwa ishi iya bẹ ọ tọo kwabedu ụbvu. ⁵ Ọ bekwanụ lẹ nwanyị, epfu anụ Chileke; ọzoo l'oopfuchiru Chileke; ọphu o kechiduru iphe l'ishi; bụkwa ishi iya bẹ ọ tọo kwabedu ụbvu; kẹle ono dūwaa g'ọ kpushiru ishi akpushi. ⁶ Lẹ teke ọ bụ lẹ nwanyị tee kebedu iphe l'ishi; gẹ nwanyị ọbu kpashienupho ẹgbushi iya akpashi. Ọle eshinu ọ bụ iphe-iphere kẹ gẹ nwanyị kpashia ẹgbushi; ọzoo g'ọ kpushia ya akpushi; ọ n'iya bụ gẹ nwanyị kebeje iphe l'ẹgbushi. ⁷ Nwoke ta agbaduru g'ọ kpuru okpulishi eshinu Chileke meru iya o yee ya tẹme ọ bụru iya egoshi gẹ Chileke dū-be biribiri; obenu lẹ nwanyị egoshi gẹ nwoke dū-be biribiri. ⁸ Noo l'ọ tọ bụkwa nwoke bẹ e gude iphe, shi l'ẹhu nwanyị mee; ọ kwa nwanyị bẹ e gude iphe, shi l'ẹhu nwoke mee. ⁹ Ọphu ọ bụdu nwoke bẹ o meru g'ọ bụru kẹ nwanyị; ọ chia nwanyị bẹ o meru g'ọ bụru kẹ nwoke. ¹⁰ Noo g'ọ gude nwanyị je l'ekebeje nkelishi gude goshi l'ọo ji iya nwe iya; wakwaphọ m'ọbvụ ụnwu-ọjozi-imigwe. ¹¹ G'ọ dūhabekpoo; ọ tọ dūkwa iphe, nwanyị bụ mẹ e -wofu nwoke; ọphu ọ dūkwa iphe, nwoke bụ mẹ e -wofu nwanyị l'atugba-a, anyi lẹ Kéreshi tūgbaru-a. ¹² Ọ kwa iphe, shi l'ẹhu nwoke bẹ Chileke gude mee nwanyị;

Ọ bụkwanuru nwanyị bẹ anwuje nwoke. Ole ẹphenebo shikọta Chileke, bụ iya meru iphemiphe l'ẹka.

¹³ Unu lewa iya rọ ẹnya l'onwunu. ?Ọ gbaru ke ge nwanyị ghebeje ishi ọnu l'ẹka oopfụ anụ Chileke tọo? ¹⁴ ?Unu ta amadụ le ge nemadụ gbakpọoru ụgbugba bẹ nwoke eme onwiya iphe-iphere me ọ -buru l'ọ haru ẹgbushi iya; ọ lọshia ogologo? ¹⁵ Obenu le teke nwanyị nweru ẹgbushi ogologo bẹ ọ bụchaa ya adu ụbvù. Ẹgbushi ogologo bẹ Chileke nuru nwanyị g'ọ buru iphe, e-kpuchije iya ishi. ¹⁶ Ọ -duru onye atụ ego l'ọ tọ dudu ẹgube ono; anyi te nwekwa omelali ọzo; ọphu Chiochi ke Chileke enwekwapho.

Eri nri-enyashi Nnajiuphu

¹⁷ A bya l'iphe ọwa-a, mu abya epfupfu-a; bẹ mu ta ajakwa unu ajaja iya l'edzuko, unubẹ Chiochi edzukoje agbejekwanu buru; o -shita ọphu ooye ẹka l'ogobe ẹgbuchi ndu ọzo ụzo. ¹⁸ Ke mbu iya kpọada; bu le mu numaru l'unu anọduje akparu onwunu oke me unu -dzukobe; mbu l'ọ dukwa mu g'iphe ono a-haru buru eviya. ¹⁹ Mu maru l'ọ bu eviya l'ọ tọ dudu g'eemehabe g'unu ta anodu ẹkpa l'iche iche. Ọo ya bụkwanu g'aa-majeru ndu ọphu eme iphe, duebe ree l'iphu Chileke. ²⁰ G'unu edzukojebe ono; ta abukwa nri-enyashi Nnajiuphu bẹ unu edzukojebe g'unu ria; ²¹ eshinu ọobujeru; unu gbeshi onyenonu apata nri nkiya eri angu l'ẹbe akwaberu onye ọzo. E -mechaa; ẹgu agu ndu ọo-nodu agu; mee atsụ ndu ọphu ọo-nodu atsụ. ²² Ha! ?Ọ du g'unu te enweedu ụlo, unu a-nọduje l'ibe unu eri angu obu? Tọo; ?Ọ bụkpoepho Chiochi ke Chileke bẹ unu akpọ ẹbo l'afu; bya eme ndu adudu g'ọ du phe iphe-iphere? ?Denukpoo iphe, mu e-pfuru nu

unu? ?Mu a-nōdu etu unu ẹpha iya tọ? Mu tee tukwa unu ẹpha iya!

²³ L'iphe ono, mu ziru unu ono bukwa Nnajiuphu l'onwiya pfuru mu iya; ẹ yẹbedua, bu Jizosu wotaru buredi l'enyashi mboku ono, e deru iya ye ono; ²⁴ bya ekelechaa Chileke ekele iya bya eworu iya nyawashia bya asu: “Ngge ta! Owa-a bu ogwehu mu, e gude gwee ẹja ẹhu unu. Unu meje iphe-a gude nyataje mu.”

²⁵ Nokwapho g'o wotaru okoro ono g'e richaarunri-enyashi ono bya asu: “Okoro-a egoshi oqbandzu ophuu, e gude mee mu gbaa. Teke bukpooteke unu nguru iya; unu gudeje iya nyata mu.” ²⁶ Kele teke unu ata buredi-a; bya angu iphe, shi l'okoro-a; be unu epfukashiakwaa k'anwuhu Nnajiuphu ono; jasu l'o bya.

²⁷ Su-a; onye bukwanu onye riru buredi ono; ozo l'o nguru iphe, angungu l'okoro ke Nnajiuphu ono l'uzo apfuduruoto; onye ono be ikpe ogwehu yee mee Nnajiuphu ono nmakwaru. ²⁸ Oo ya bu ge nemadzu nyochajeadaa onwiya ime teme l'o ria buredi ono ngua iphe, shi l'okoro ono. ²⁹ L'onye eri angu; ebe o makahadu iphe, ogwehu Kereshi bu; l'eritakwa bya angutakwapho ikpe eye onwiya l'ehu. ³⁰ O kwa iphe ono meru g'o gude igwe oha l'ime unu du nyegenyege; ndu azee l'iphememe; ndu onwu egbushia. ³¹ Obenu le teke anyi vuwaa uzo kpee onwanyi okpobe ikpe; o n'ia bu l'e tee kpeedu anyi ikpe. ³² Ole teke o bukwanu le Nnajiuphu kperu anyi ikpe; kpechaa bya ahua anyi ahuhu; iphe, oome iya buana g'oo too jehedu achigbabe anyi le ndiphe tuko nmaa ikpe.

³³ Oo ya bu; unwunna mu; unu -nodu edzuko k'eri nri Nnajiuphu ono; unu nodujekwa kwaberu nwibe unu.

³⁴ Teke o bu l'o duru onye egu agu; g'onye ono vuru uzo riadaa nri l'unuphu; o nonyakwaa Chileke nmaa unu ikpe

k'edzuko, unu edzukoje. Noo gẽ k'ono du bu ono. A bya l'iphemiphe ndu ophuu; ono buwaro mu -bya; mu eyefua ya onu.

12

Iphe-oma, shigba l'eka Unme-du-Nso

¹ A bya le k'iphe-oma, shigbaa l'eka Unme-du-Nso; unwunna mu; gẽ mu mekwaa ya g'o doo unu enya ree.

² Unu maanaru-a le teke unu eshidu buru ke Kereshi be bu unwu-obvu-a, ete pfudu opfu-a shi alo unu kpurukpuru. O buru iya shi anoduje egoshi unu uzo unu a-nodu eshi. ³ Noo g'o shitaru mu nodu eme g'o doo unu enya l'o to dukwa onye gude Unme Chileke epfu opfu abya asu: "Ge Jizosu vukwaru onu." Ophu o dukwapho onye adu ike epfufuta su le Jizosu bu Nnajiuphu gbahaa l'o gude Unme-du-Nso epfu iya.

⁴ Iphe-oma, shi l'eka Unme-du-Nso du iche iche; ole o kwa Unme lanu kpoloko bu Unme, anukota iya nu.

⁵ Nokwapho g'uzo, e shi ejeru Nnajiuphu ozi dukwapho iche iche; o bukwarupho Nnajiuphu lanu ono be a tukoru ejeru ozi obu. ⁶ Ike, Chileke eyeje nemadzu l'ehu g'o gude meje iphe, dukwa iche iche. Ole o kwaa Chileke lanu emekotaje ike ono g'o ree ire l'ehu onyemonye, o yeru iya l'ehu. ⁷ Chileke gbẽ l'eka onyemonye l'ehu l'ehu egoshi g'ike Unme-du-Nso erebe ire g'o buru iphe, a-baru onyemonye urwu. ⁸ Mbu; onye lanu be Unme-du-Nso ono eyeje ike l'ehu k'opfu oopfufe opfu mmamiphe; l'o ye onye ozo ike l'ehu k'opfu oopfufe opfu, egoshije l'o maru Chileke okpobe amama. O bukwaru-a Unme-du-Nso lanu ono. ⁹ O -gbeshi l'obya eye onye ozo ike l'ehu; ike k'ekweta ke Chileke gudeje iya eme iphe, dugbaa biribiri; l'oo bukpoekwarupho Unme-du-Nso lanu ono. Onye ophu ooye ike l'ehu k'emeje g'onye iphe, eme

wekōrohu; ọ bụkwaru-a Unme lanụ ono kpōekwapho. ¹⁰ Onye ọzo bẹ ooyeje ike l'ẹhu k'eme iphe-ọhumalenya; l'ooye onye ọzo ike l'ẹhu k'epfuchiru Chileke; l'ooye onye ọzo ike l'ẹhu k'akọkahaje iphe, shi l'ẹka Unme-dụ-Nsọ l'ọphu eshidu iya nụ; l'ooye onye ọzo ike l'ẹhu k'epfuje l'olu Unme-dụ-Nsọ; l'ooye onye ọzo ike l'ẹhu k'akọje iphe, eepfu l'olu Unme-dụ-Nsọ ono. ¹¹ Ọle ọ tūkokwaru bụru Unme-dụ-Nsọ lanụ atūkotaje iphemiphe ono eme. Oomejeru onyemonye iphe-oma, dū iche iche g'ọ tūru obu iya onyo l'oome iya.

Ogwẹhu lanụ yẹle iphemiphe, p̄fukashiru iya nū

¹² Lẹ Chiochi kẹ Kéreshi dūkwa g'ogwẹhu lanụ. Ogwẹhu nemadzū enwejekwaru mp̄fukashi, dū igwerigwe. A makwaru-a lẹ mp̄fukashi iya dū igwerigwe; ọle ọ b̄uenupho ogwẹhu lanụ g'ọ b̄u iya. ¹³ Kẹle iphe, b̄ukpoo g'anyi ha; ?i b̄u onye Jiu-o; ?i b̄u onye Gurisu-o; ?i b̄u ohu-o; ?i b̄u amadu-o; Unme-dụ-Nsọ tūkoakwaru anyi jigba; anyi b̄uru ogwẹhu lanụ teke anyi meru baputizimu; anyi tūko gbawaru mgba lẹ Unme-dụ-Nsọ ono, b̄u iya bẹ eyeje anyi ike l'ẹhu ono.

¹⁴ L'ogwẹhu l'onwiya ta akpūkokwaru ophu. Iphe, dū iya nū dūkwa igwerigwe. ¹⁵ Ọ -b̄u l'ọo kẹ g'okpa sū l'eshinu ya ab̄udu ẹka bẹ ya ab̄ukwa iphe, dū l'ẹhu; ?b̄u iphe ono a-kpōshi iya ab̄uru iphe, dū l'ogwẹhu? ¹⁶ Ọzoo l'ọo nch̄i s̄uru l'eshinu ya ab̄udu ẹnya bẹ ya ab̄ukwa ẹhu nemadzū; ono taa kpōshikwa iya ab̄uru iphe, tepfuru l'ẹhu. ¹⁷ Ọme ẹhu l'ọphu tūkoru b̄uru ẹnya lanụ; ?b̄u ḡunu bẹ e gege egudeje anū iphe? Mb̄ua ọme ogwẹhu l'ọphu tūkoru b̄uru nch̄i lanụ; ?b̄u awe bẹ e gege egudeje anū ishishi iphe? ¹⁸ Obenu lẹ g'ọ dū nta-a b̄u lẹ Chileke meru ẹhu nemadzū bya emobechaa ya mp̄fukashi iya g'ọ tūberu. ¹⁹ Ọme iphemiphe ono tūkoru kpūkoo ophu; ?

bù awe gege abùru ogwèhu? ²⁰ Obe lẹ g'ò dù nta-a bù l'ò nweru mpfukashi igwerigwe; òlẹ ò tũkokwaru-a bùru ogwèhu lanu.

²¹ Ọ tọ dùdu teke ẹnya a-gbẹ gbẹshi l'ò sù ẹka l'ò tọ dùdu iya mkpa. Ọphu ọ dukwapho teke ishi a-gbẹshi l'òosu ọkpa l'ò tọ dùdu iya mkpa. ²² Ọ chia iphe, meru nu bù lẹ mpfukata ẹhu anyi ibiya ono, gbaru g'ò bù iya bẹ ẹnya kachaa alwalwa ono bẹ gbẹ yihukwaru-a l'iphe, aba lẹ mkpa. ²³ Teme mpfukata ẹhu anyi ibiya ono, anyi riru l'ò tọ kwataduru gbaa k'akwabẹ ùbvù ono bẹ anyi akwajẹ akwa gude kwabẹ iya ùbvù, pfuru iche. Ibiya ono, anyi edomi edomi ono bẹ anyi gbẹ akajenu eleta ẹnya; ²⁴ mbù eleta ẹnya, mkpa iya aduduru ibiya ọzo. Ọlẹ Chileke wolẹru-a ẹhu nemadzù dzepfua nanu; bya eworu ùbvù, ka shii kwabẹ mpfukata ẹhu anyi ibiya ono, aakwabẹ-ziduru ùbvù ono. ²⁵ Noo ya bù; gẹ mpfukata ẹhu yẹ nwibe iya ata adzọeduru onwophẹ ẹnya; gbahaa g'ẹphe tũkoje leta nwibe phẹ ẹnya. ²⁶ Teke iphe eme nanu ẹhuka; oomedzukwaruphọ ẹhu l'ophu. Teke a kwabẹru nanu ùbvù; ẹhu l'ophu etedzuru ẹswa iya.

²⁷ Sù-a; ọ kwa unu bù ogwèhu Kéreshi; onyemonye l'ẹhu l'ẹhu bùru mpfukata iya. ²⁸ Chileke bya atua nemadzù ẹka iche iche lẹ Chiochi shi nno goshi onyemonye iphe, ọo-nọdu eme. O vuru ọzo bya edobe ndu-ishi-ozì; bya edotsota iya ndu epfuchiru iya nu. Ọ bya lẹ k'ẹto bya edobe ndu ezi iphe; bya edobe ndu emeje iphe-ọhumalenya; waa ndu emeje ndu iphe eme g'ẹphe wekọrohu; waa ndu anọduje eye ẹka; waa ndu mkpozi-ọzo; mẹ ndu epfuje l'olu Unme-dù-Nsọ. ²⁹ ?Bù onyemonye bù-dzuru ndu-ishi-ozì? ?Bù onyemonye bù onye epfuchiru Chileke? ?Bù onyemonye bù onye ezije iphe? Tọo ?bù g'ẹphe ha nwedzuru ike eme iphe-ọhumalenya? ³⁰ ?Bù g'ẹphe ha bẹ Chileke yedzuru ike l'ẹhu k'eme

g'onye iphe eme wekọrohu? ?Bụ ọha epfudzuru l'olu Unme-dụ-Nsọ? Tọo ?bụ ọha aduje ike kọo iphe, eepfu l'olu, Unme-dụ-Nsọ? ³¹ Sụ-a; g'onyenonu yejeru ẹhu lẹ gẹ ya e-shi meje iphe ono ndu ọphu ka mkpa; ọle mu e-goshiadaa unu ọzo ọphu bụ iya kwataru kabakpọoro mkpa.

13

N-yemobu

¹ Sụ-a; ọ tọ dukwa mẹ mu aghajẹ opfu-alị mu egudeje iphe, bukpo opfu unwu-eliphe; ọzoo opfu unwu-ojozi-imigwe epfu; n-yemobu rwuhu mu l'ẹhu bẹ mu bukwa njaja ogena; ọzoo eze ọkunmengu, aha igbangu igbangu. ² Mbụ-a; ọ tọ dukwa mẹ Unme-dụ-Nsọ yechaaru mu ike l'ẹhu gẹ mu pfuchijeru Chileke; mu bya amacharu Chileke ọkpobe amaru; makotaru iphemiphe, o shi domia edomi; bya akachakpọo ekweta kẹ Chileke ono kweshia ike; k'ọphu bụ mu -sụ úbvú g'ọ phofu l'ẹka ọ nọ; l'ọ phofu; ọphu mu enwedu n-yemobu bẹ ọ tọ dukwa iphe, mu bụ. ³ Ọ tọ dukwa mẹ mu tukuroru iphe, mu nweru enweru mekọta iphe-oma; bya ekwechaa g'e woru mu kpọo ọku; ẹbe mu enwedu n-yemobu; ọ tọ dukwa urwu, mu ritaru iya.

⁴ N-yemobu atajeru iphe nshi; bya eme odoo. O to jidu jiji-ẹnya. Ẹbe ookudu onwiya; ọphu o tudu onwiya ọ-phushia-ugbu. ⁵ O to kwejedu gẹ nemadzu mee iphe, adudu ree; ọphu ookwejedu gẹ nemadzu buru o-pfunkiya-anu-nkiya; ọphu ẹhu eghujedu iya eghu egwegwa; ẹbe ọ madu k'edo iphe l'ọkpoma. ⁶ O to tejedu ẹswa ekpu iphe, apfuduru nhamunha. Ọ chia iphe, bụ irelanu bẹ o teje ẹswa ekpu. ⁷ Ọotajeru iphemiphe nshi; ọ nọdu ekwetajẹ iphemiphe; ele ẹnya k'oma l'iphemiphe; bya apfu-shijẹ ike l'iphemiphe.

⁸ N-yemobu a-dūkwa gbururu jeaduru aduru. Ike k'epfuchiru Chileke e-mechakwaa bvū; ike k'epfu l'olu Unme-dū-Nsọ abvū. O bụkwarupho egube ono bẹ k'amaru Chileke okpobe amama l'a-bvū nkiya. ⁹ Kẹle anyi maru mapete; anyi nọdu epfuchiru Chileke epfupete iya. ¹⁰ Obenu lẹ teke Chileke e-goshigbu anyi g'iphemiphe gbaru; bẹ iphe, bụkpoo iphe, edzuduru oke ephushihu.

¹¹ Sụ-a; teke mu shi bụru nwata bẹ mu shi epfufe g'ūnwegirima; mu shi nweru egomunggo ūnwegirima; shi arije ọriri g'ūnwegirima. Mu bụerupho onye bụ ọgerenya; mu tūko ẹhu nwata gwọbe. ¹² Lẹ nta-a bẹ anyi gudekwa onyo aphū iphemiphe ono inyoki inyoki. O -rwua teke ono bẹ anyi lẹ Kéreshi a-hūmagbabe onwanyi l'iphu l'iphu. Nta-a bẹ mu maru iphemiphe ẹka lanū ẹka lanū; o -rwua teke ono bẹ mu a-makotaru iphemiphe okpobe amaru; gẹ Chileke makotaru mbẹdua nta-a.

¹³ Ọo ya bụ l'ọo ụzo iphe ẹto a-phodu, bụ iya bụ ekweta; waa iphe, eele ẹnya iya; waa n-yemobu; ẹphe n'ẹto tukuru bụru iphe, ta ayidu bvū abvūbvū; ọle ọphu kachaa shii bụ n-yemobu.

14

Iphe-oma kẹ mpfuchiru waa k'epfu l'olu Unme-dū-Nsọ

¹ Unu seje g'unu yee nwibe unu obu. G'iphe-oma, shig-baa l'ẹka Unme-dū-Nsọ gū-shijekwa unu ike; kelekele k'iphe-oma k'epfuchiru Chileke. ² L'onye epfu l'olu Unme-dū-Nsọ ta abụkwa nemadzu bẹ oopfū anū; ọ kwa Chileke bẹ oopfū anū. O gude Unme Chileke epfu iphe, Chileke shi domia edomi. ³ Obenu l'onye epfuchiru Chileke bẹ bụ nemadzu bẹ oopfū eyeru. O shi egube ono emetse onyemonye emetse; eyeru phẹ ọku g'obu shihu phẹ ike bya adukwa phẹ phọ obu. ⁴ Onye epfu opfu l'olu

Unme-dụ-Nsọ bụkwa onwiya bẹ oometse; obenu l'onye epfuchiru Chileke bẹ bụ Chiochi bẹ oometse.

⁵ Iphe, gege adu mu ree bu g'iphe, bukpuo g'unu ha pfuje l'olu Unme-dụ-Nsọ; ọle o gege akabaa mu ro ree g'a su l'unu epfuchiru Chileke. Kele onye epfuchiru Chileke kakwa onye epfu l'olu Unme-dụ-Nsọ; gbahakwaa l'o nweru onye duru ike ko iphe ono, oopfu ono. Oo ya bukwanu g'opfu obu a-buru iphe, a-nodu emetse Chiochi emetse. ⁶ Mbua; unwunna mu; mu -byapfuta unu bya egude olu Unme-dụ-Nsọ epfu eyeru unu; ?denu urwu, unu e-rita iya? Gbahaa le mu byaru bya egoshiahaa unu iphe ophu; ozo le mu byaru bya eziahaa unu k'amaru Chileke okpobe amama; ozo le mu byaru bya epfuchiaharu Chileke; ozo le mu byaru bya awata unu ezi iphe.

⁷ Mbukpoonu iphe, du g'opu ozo ogumogu, bugbaa iphe, adzudu ndu; a ta amajekwaru iphe, oopfu gbahaa l'odafuta oda ree. ⁸ Teme teke o bu l'onye egbu opu-ogu te egbuduru iya g'eegbuje iya g'a maru l'ogu abya; ?bu onye abya akwakobe k'eje ugu? ⁹ Oo ya bu l'o nokwapho g'o du l'ehu unu bu ono. Teke o bu l'unu epfu l'olu Unme-dụ-Nsọ; unu nodu epfu opfu, a madu iphe, o bu; ?denu g'ee-shihunu maru iphe, unu eepfu? Unu ta amadu l'opfu, unu epfu bu pherephere be unu epfu iya anu. ¹⁰ A ta atukwa iya ego l'opfu-ali ndu dugbaa iche iche, du le mgboko-a be a ta agutadu aguta; obenu l'o to nwedu me nanu te edojedu ndu epfu iya nu enya. ¹¹ Oo ya bu le teke o bu le mu ta anudu opfu-ali obu; mu aburu ohantsu l'enya onye epfu iya nu; onye epfu iya nu a bukwanuru mbedua onye ohantsu. ¹² Nokwapho g'o du l'ehu unu; eshinu iphe-oma, shi l'eka Unme-dụ-Nsọ agu unu agugu; unu kukebe eh

g'ọ dū unu shi l'ẹhu; g'ọo-bụkwanuru iphe-oma, a-nọdu emetse Chiochi emetse.

¹³ Ọo ya bụ; g'onye epfu opfu l'olu Unme-dụ-Nsọ; pfujekwaphọ nū Chileke g'ọ nū iya ike g'o gudeje kọo ya g'a maru iphe, oopfu. ¹⁴ Lẹ teke mu epfu l'olu Unme-dụ-Nsọ; bẹ bụkwa obu mu bẹ epfu anụ Chileke; ọp̄hu iphe, oopfu edokwanuru mu ẹn̄ya. ¹⁵ ?Bụkwanu gūnu ọzo bẹ gbaru mu l'ememe? Mu e-gude Unme-dụ-n̄sọ epfu anụ Chileke; agū ebvu, doru ẹn̄ya. ¹⁶ L'ọ -būru l'ijja Chileke ajaja l'olu Unme-dụ-Nsọ; ?d̄enu g'onye ọzo, n̄ọ l'ẹka ono iphe, iipfu edoduru ẹn̄ya e-me sū: “Nokwa g'ọ dū” l'ajaja ijja; eshinu ọ madū iphe iipfu? ¹⁷ İinodukpokwa ekele ekele rengurengu; ọle o too metsedu onye anū iya nū.

¹⁸ Mu ekele Chileke ekele lẹ mb̄edua l'onwomu kak̄ota unu epfu opfu l'olu Unme-dụ-Nsọ. ¹⁹ Ọle o -beta ḡe mu n̄odu lẹ Chiochi gude olu Unme-dụ-Nsọ pfua unubuku opfu; mu ahatachia epfu nwakpuru opfu ise, doru ẹn̄ya gude ezi ndu ọzo iphe.

²⁰ Unwunna mu; unu ta arijeshinu ọriri g'unwegirima nsh̄i. Unu dūjekwa ḡe nwaswa m̄e a -bya l'eme ẹjo-iph̄e. Teke a byaru l'egomunggo; unu enweru egomunggo ọgerenya. ²¹ L'ẹkwo ekemu b̄e e dekwaru sū:

“Mu e-gude opfu ndu al̄i ọzo,
 dūgbaa iche iche;
 m̄e opfu ndu ọhantsu gude
 pfuru yeru ndu nkemu.
 Ọle ọ t̄ọ bụkpodanu l'eph̄e
 angab̄e nch̄i l'iph̄e,
 mu epfu.*”

Nokwa iphe, Nnaj̄uphu eepfu. ²² Ọo ya bụ l'epfu opfu l'olu Unme-dụ-Nsọ bụ iphe-ọhubama, dūru ndu ekwedu

* 14:21 14:21 Gūnaa Azá 28:11.

kẹ Kéreshi; ọ tọ bụdu kẹ ndu kweru kẹ Kéreshi. Ọphu epfuchiru Chileke abụkwa kẹ ndu ekwedu kẹ Kéreshi; ọ kwa kẹ ndu kweru nkiya.

²³ Ọo ya bụ lẹ-a; teke Chìochi l'ophu dzukọberu; onyemonye tuko epfu opfu l'olu Unme-dụ-Nsọ; ndu shi eshishi; ọzoo ndu te ekwedu kẹ Kéreshi byapfuta unu; ?ndu ono taa sūdunu l'ọo ọbvụ bẹ eme unu? ²⁴ Obenu teke ọ bụ l'onyemonye bẹ epfuchiru Chileke; onye ete ekwedu kẹ Kéreshi; ọzoo onye shi eshishi bya abata; ? tị madụ l'iphe ono, ọonukota ono bẹ a-nọdu erwu iya l'ẹhu; ẹnya agbarwua ya l'iphe-ẹji, o meshiru. ²⁵ Iphe ono, ọonu ono atụaru iya iphe, ọori l'egomunggo jala. Ọo ya bụ; onye ono adaa kpurumu l'alị wata abarụ Chileke ẹja; watakwapọ epfu sụ: “Ọ bụkpoo ọkpobe-opfu; unu lẹ Chileke nọpho l'ẹka-a.”

Iphe, eeme ememe lẹ Chìochi

²⁶ Sụ-a; unwunna mu; ?ọ dụ unu g'ọ bụ gūnu bẹ mu epfu? Teke unubẹ Chìochi dzukọberu; onye egude ebvụ-oma; onye egude opfu Chileke ezi iphe; onye aphụ ọphulenyā; onye epfu opfu l'olu Unme-dụ-Nsọ; onye akọ iphe, opfu Unme-dụ-Nsọ ono bụ. G'onye eme ọphu oome mee ya g'ọ bụru iphe, ee-gude emetse unu emetse. ²⁷ Ọ -bụru l'ọ dūru ndu epfu opfu l'olu Unme-dụ-Nsọ; g'ọ bụru-a nwụmadzu ẹbo; ọzoo ẹto kpẹekpu; ọ l'ọo g'onyenonu pfuje nkiya mẹ o -rwube iya. G'onye lanụ lẹ g'unu ha kọo iphe, opfu. ²⁸ Teke ọ bụ l'ọ tọ dudu onye akọ iphe, ọ bụ g'ẹphe tūkokwa dobegbaa ọnu doo lẹ Chìochi; g'onye ọphu nọnu pfujeekwapọ nū onwiya pfukwapọ nū Chileke. ²⁹ Gẹ ndu epfuchiru Chileke dūkwapho ẹbo; ọzoo ẹto pfua; ndu ọphuu elerwee iphemiphe, ẹphe pfuru ẹnya. ³⁰ Teke ọ bụ l'onye ọzo, nọ lẹ ndzukọ l'ẹka ono watarụ ọphulenyā; g'onye kẹ

mbu pho, shi epfu opfu pho dobeekwapho onu doo. ³¹ Unu a-dũkwa ike epfuchiru Chileke nanu nanu; g'e-shi g'onnyemonye anwũta iphe; teme Unme Chileke eyekwarũpho onnyemonye oku g'obu shihu iya ike. ³² G'onnyepfuchiru Chileke dũjekwa ike sedeje onwiya me o - nodu epfu iya. ³³ Le Chileke ta abũkwa onny mkpaka; o bũchikwaa onny nchi-odu-doo; bu iya bu g'o dũgbaa l'iphe, bũkpoo ndzukũ ndu-nsũ l'ophu.

³⁴ Unwanyi unu dobejekwa onu doo le Chiochi. Unwanyi be e te kwekwa g'ephe pfuje opfu me ndu Chiochi dzukũbe. O chia g'ephe wozeje onwophẽ ali; l'o noo iphe, ekemu pfuru bu onoya. ³⁵ O -buru l'o nweru iphe, agu phe amaru; ephe -laa unuphu; ephe akpataje ji phe ishi iya. L'o bu iphe-iphere ke ge nwanyi pfujeru l'eka Chiochi dzuru edzumoke epfu opfu. ³⁶ Mu suru; ?o du unu g'o bu l'eka unu be opfu Chileke shi? Tõo ?bu unu beberu nũma-sweru opfu Chileke? ³⁷ G'onnyerũ le ya bu onny epfuchiru Chileke; õzoo le ya nataru iphe-õma, shi l'eka Unme-dũ-Nsõ; g'o doo onny ono enya l'iphemiphe-a, mu ederu unu-a bu ekemu, shi l'eka Nnajiuphu. ³⁸ Onny agũbeduru iphemiphe-a iphe; g'a ta agũbekwapho onny obu iphe.

³⁹ Oo ya bu; unwanu mu; g'o gũje unu egu epfuchiru Chileke. Ophu unu akpõshijekwa epfu opfu l'olu Unme-dũ-Nsõ. ⁴⁰ Oo l'epho g'e meje iphemiphe g'o gbaru waa l'o rwuberu iya.

15

Eshi l'onwu teta ke Kereshi

¹ Unwanu anyi; nta-a bu ge mu bya anyatabaaru unu k'ozĩ-õma ono, mu zihawaru unu ono. Ozi-õma ono be unu nataru; o buru iya meru iphe, ekwekwe, unu kweru ke Kereshi shihuru ike. ² Oo ya bu l'e gude ozi-õma ono

adzọo unu; mbụkwa mę unu -gudeshia ya ęka ike gę mu ziru iya unu; gbahakwaa l'ekwekwe, unu kweru te enwedu ishi.

³ Iphe ono, kachaa mkpa, e yeru mu l'ęka; mu zia unu ono; tęme ọ bụhukwarupho iphe, e dehawaru l'ękwo-opfu Chileke l'o noo g'ọo-du bụ ono; bụ lę Kéreshi nwụhuru opfu l'anyi meru iphe-ęji. ⁴ E lia ya; o rwua lę mbọku k'ęto Chileke kulia ya. Ọ bụkwarupho g'e dehawaru iya l'ękwo-opfu Chileke. ⁵ Lę Pyịta hụmakpooru iya; ndu-ishi-oziri iri l'ębo phọ hụmakwa iya phọ. ⁶ E mechaa unwunna anyi ndu ghataru unu nemadzu l'ụkporo ụmadzu ise hụma iya lę mgbo lanu. Ndu k'ono hagbaru tuko nọdukwadua ndzu nta-a; ọle o nwekwaru-a ndu ọphu haru nwụhuwaa nu. ⁷ E mechaa; Jiemusu bya ahuma iya; ndu-ishi-oziri ọphunapho g'ęphe ha hụmakwa iya phọ.

⁸ O be l'ikpazu iya; mbędua l'onwomu huma iya. Mbędua duwaa gę nwa a nwuru lę teke ọ kaduru akaka; ⁹ noo l'ọ kwa mbędua bę ęnya kachaa alwalwa l'iphe, bụkpoo ndu-ishi-oziri Jizosu l'ophu; mbu lę mu ta agbakpọdaaru nu g'ee-ku mu onye ishi-oziri Jizosu; kęle mu shi akpaję Chiochi kę Chileke ęhu. ¹⁰ Obenu l'e shi l'eze-iphe-oma kę Chileke, mu buru onye-a mu bu-a; ọphu eze-iphe-oma ono, Chileke meru nu mu ono abudu iphe-mmanu. Mu gbęchianu bya akakota ndu-ishi-oziri ọphuu g'ęphe ha ejeshi oziri ike; e gudekpọoro l'ọ tọ budo mu meru iya l'onwomu; l'ọo eze-iphe-oma Chileke reru ire l'ęhu mu. ¹¹ Ọo ya bu; m'ọ bu mu ziru unu oziri ono; m'ọ bu ęphebedua-o; ọo iphe lanu ono bę unu kwetaru.

Eshi l'onwu teta k'anyi

¹² Sụ-a; ọ -buru l'oziri-oma ono bu lę Kéreshi shi l'onwu teta dzuru ndzu; ?dęnuhununu g'o gude unu gbę

haru sù l'e tee shidu l'Ọnwu eteta? ¹³ Teke ọ bụ eviya lẹ ndu nwùhuru anwùhu tee shidu l'Ọnwu eteta; ọ n'iyaa bụ lẹ Kéreshi te etetaduru. ¹⁴ Teke ọ bụkwanu lẹ Chileke te emeduru Kéreshi g'o shi l'Ọnwu teta dzuru ndzụ; ọ n'iyaa bụ l'iphe ono, anyi ezi ono bụ iphemmanu; ekweta, unu kwetarụ kẹ Kéreshi bụkwarupho iphemmanu. ¹⁵ Ọ tọ bụdua iphemmanu kpụ; obenu l'ono egoshifua l'anyi adzụ ụka atụ-kobe Chileke eshinu anyi epfu l'Ọo Chileke meru Kéreshi o shi l'Ọnwu teta dzuru ndzụ. E -mechaa; ọpflu Chileke emeduru ndu nwùhuru anwùhu ephe teta dzuru ndzụ eviya; ọ n'iyaa bụ l'anyi dzuru ụka. ¹⁶ Teke ọ bụ lẹ Chileke tee medu ndu nwùhuru anwùhu g'ephe teta dzuru ndzụ ọzo; ọ n'iyaa bụ lẹ Chileke te emekwarupho Kéreshi g'o shi l'Ọnwu teta dzuru ndzụ. ¹⁷ Teke ọ bụkwanu lẹ Chileke te emeduru Kéreshi g'o shi l'Ọnwu teta dzuru ndzụ; bụ n'iyaa bụ l'ekweta, unu kwetarụ kẹ Kéreshi bụ mkpọkoro iphe, enwedu ishi; tẹme iphe-ẹji, unu meshiru dukwapho unu l'ẹhu g'ọ dū iya. ¹⁸ Ọ n'iyaa bụkwapho lẹ ndu onoya, ephe lẹ Kéreshi tūgbaru tẹme ephe nwùhu ono bẹ lawarụ l'iswi. ¹⁹ Ọme ẹka anyi eleberu ẹnya iphe, Kéreshi e-meru anyi bụ lẹ ndzụ-a, anyi nọ nta-a kpurumu; mẹ anyi a-bụkwaru ndu gege akachaa agba k'akuru ọshi lẹ mgboko-a.

²⁰ Obenu lẹ Kéreshi shiwaa l'Ọnwu teta dzuru ndzụ. Ọ bụwaru iya bụ onye mbụ lẹ ndu nwùhuru anwùhu, e-shi l'Ọnwu teta. ²¹ Ọ kwa g'Ọnwu shi l'ẹka nwoke lanu barahu bụkwapho g'eteta l'Ọnwu e-shi l'ẹka nwoke lanu vuru ire. ²² Ọo gẹ nemadzụ mgburugburu anwùhuje; kẹle ephe shi l'ẹhu Ádamu bụkwapho g'iphe, bụ ndu ephe lẹ Kéreshi tūgbaru bụru nanu e-nweru ndzụ ọphúú. ²³ Obenu l'oniyemonye e-teta nọdu ndzụ mẹ o -rwubeẹ ya pho; Kéreshi, bụ iya bụ onye mbụ-a

vuwaa ụzọ; ndu bụ ndu kẹ Kéreshi etsota iya mẹ ọ -byaẹpho. ²⁴ E -mechaa; l'a byarwuta lẹ teke ikpazụ, bụ teke Kéreshi e-woru ike, o gude bụru eze ye Chileke, bụ Nna l'ẹka; teke ono bẹ oo-mewaa g'ike bvukota iphe, bukotakpoo ọchi-ọha mẹ ọ-nọ-l'oke-ọkwa mẹ o-gude-ike g'ẹphe ha. ²⁵ Ọle Kéreshi bụfutaje eze, ndu mgboko l'ophu jasụ teke Chileke e-me iya g'ọ zọpyabe ndu ọhogu iya l'ọkpa. ²⁶ Iphe, bụ ọhogu ikpazụ, oo-mebyi ìrè iya bụ ọnwu. ²⁷ “L'o meakwaru ọ zọpyabe iphemiphe l'ọkpa iya.” Ọphu doru ọnya bụ l'a -sụ l'ọ zọpyaberu “iphemiphe” l'ọkpa bẹ a gụfuru Chileke; mbụ onye ono, meru ọ zọpyabe iphemiphe l'ọkpa ọbu. ²⁸ Teke Nwa kẹ Chileke bụepho ishi iphemiphe; noo teke oo-woru onwiya woru ye Chileke ono l'ẹka; mbụ onye ono meru g'ọ bụru ishi iphemiphe ono; k'ọphu Chileke a-bụru ishi iphemiphe.

²⁹ Ọ -bụru l'e tee shidu l'ọnwu eteta; ?ee-mekwanu ndu ono imeagha? mbụ ndu ono, e meru baputizimu l'iswi ẹhu ndu nwụhuru anwụhu ono? Ọ -bụru lẹ ndu nwụhuru anwụhu te etetadu ililekpoo; ?bụhunu gụnu meru g'o gude a nọdu eme baputizimu l'iswi ẹhu ndu ono? ³⁰ ?Bụ gụnu meru g'o gude anyi nọdu anọduje alọ ishi anyi alọlo tekenteke? ³¹ Ụnwunna mu; ọ kwa eku onwomu, mu egudeje unu eku k'atụgba, anyi l'unu tūgbaru lẹ Kéreshi meru g'o gude mu nọdu epfuru iya unu sụ lẹ mu anọdujekwa ala maa mbọku-mbọku. ³² Ọ -bụru lẹ mu l'ẹjo anụ-ẹgbudu lwuru ọgu lẹ Efesosu ọ bụru nemadzụ bẹ mu alwudoru iya; ?bụ gụnu bẹ mu ritaru iya? Ọ -bụru lẹ ndu nwụhuru anwụhu tee shidu l'ọnwu eteta; “G'anyi watanu eri g'ọ dū anyi; ngụ g'ọ dū anyi; o -be echele; anyi anwushihunu.”

³³ Unu te ekwekwa g'e dephua unu. “Ọ kwa ẹjo ọswi emebyi ama onye.” ³⁴ Ọphu g'egomunggo lwadupho

unu azu; g'unu ahaa eme iphe-eji wata eme iphe, p̄furu ̄oto. Iphe, mu ep̄fukwa ̄owa-a būkwa g'iphere kab̄e du unu. L'o nwekwaru g'unu ha ndu ̄ophu amadu Chileke ililekp̄oo.

Ogw̄ehu, ee-gude shi l'̄onwu teta

³⁵ O nweru onye a-gb̄eshi l'̄o jia s̄u: ? D̄enukpoo ḡe ndu nw̄uhuru anw̄uhu e-shi teta dz̄uru ndz̄u? ? Bu ogw̄ehu du idagha b̄e ep̄he e-nweru m'ep̄he teta ̄obu? ³⁶ I būkwanu onye-eswe! Iphe, ī k̄oru l'al̄i te erwutaj̄ekwa ̄ozo gbahaa l'o rehuru ewa ³⁷ ̄Ozo bu l'̄o t̄o būdu g'iphe, a kuru l'al̄i aduje m̄e o -vugheep̄ho bu g'̄o duje teke anyi kuru iya. Iphe, akuje būkwa akpuru iya; mbu du g'akpuru akpe m̄e akpuru-iphe ̄ozo, dugbaa l'udu iya l'udu iya. ³⁸ ̄Ole Chileke egudeje eka iya meru ugbugba nu iya g'̄o du ȳebe Chileke ree; ̄o nuje akpuru iphemiphe ugbugba, gbaru iya nu.

³⁹ An̄ehu iphemiphe ta agbadzukwaru nanu. Nemadzu nweru an̄-ehu nkiya; an̄ nweru nkiya; enu nweru nkiya; ema nweru nkiya.

⁴⁰ Iphe, du l'imigwe nweru ugbugba nkiya. Iphe, du l'al̄i nweru ugbugba nkiya. ̄Ole biribiri k'ugbugba iphe, du l'imigwe b̄e du iche; biribiri k'ugbugba iphe, du l'al̄i dukwapho iche. ⁴¹ Ēnyanwu nweru biribiri nkiya iche; ̄onwa nweru nkiya iche; nokwapho ḡe kpokpode nweru biribiri nkiya. K̄e kpokpode bu l'o nweru ̄ophu akaje ibe iya ekeke.

⁴² Nokwapho g'̄o-du teke ee-shi l'̄onwu teta dz̄uru ndz̄u. Ēhu nemadzu rehuru erehu teke e yeru iya l'al̄i. ̄Ole teke oo-teta dz̄uru ndz̄u b̄e ̄o-buru iphe, tee rehubāedu erehu. ⁴³ E liru iya teke ̄o du ideyideyi; ̄ole o -teta b̄e ̄o-du biribiri l'̄enya. E liru iya teke ike adudu iya; ̄ole teke oo-teta b̄e ike a-du iya. ⁴⁴ E liru iya teke

Ọ bụ ogwēhu mmanụ; teke o-shi l'Ọnwu teta bẹ ọ-
 bụru ogwēhu, shi l'ẹka Unme Chileke. Ogwēhu mmanụ
 dukwa; ogwēhu shi l'ẹka Unme Chileke dukwapho. ⁴⁵ L'e
 dekwaru l'ekwo-opfu Chileke sụ: “Onye ivuzo, bụ Ádamu
 bẹ e meru ọ bụru nemadzu, dzụ ndzụ.” Ọ bya emee
 Ádamu k'ikpazu, ọ bụru unme, emeje g'anodu ndzụ.
⁴⁶ Ọ tọ bukwa ugbugba, shi l'imigwe evujeru ụzo; ọ
 kwa ugbugba k'eliphe evujeru ụzo; k'imigwe etsota iya.
⁴⁷ Nwoke mbụ bẹ e gude ẹja, shi l'alị mee; nwoke k'ẹbo
 shikwanụ l'imigwe. ⁴⁸ Ọo gẹ nwoke mbụ pho e gude ẹja,
 shi l'alị mee pho dụ; bụ g'iphe, bụ ndu e gude ẹja, shi
 l'alị mee dukota. Ọ bụru gẹ nwoke ọphu shi l'imigwe
 dụ; bụ gẹ ndu k'imigwe a-dukotakwapho. ⁴⁹ Ọo 'ẹpho
 g'anyi yeru onye k'ono, e gude ẹja, shi l'alị mee ono bụ
 g'anyi e-ye onye k'imigwe.

Teke Kéreshi l'a-bya ọzo

⁵⁰ Ụnwunna mu; iphe, mu e-pfufuaru unu bụ; iphe,
 nweru anụ-ẹhu bya enweru mee taa bahukwa l'ẹka
 Chileke bụ eze. Ọphu iphe, erehuje erehu ta anojekwa
 je aduwaruro aduru. ⁵¹ Unu ngabẹ nchị gẹ mu
 kọoru unu iphe, e shi domia edomi. G'anyi ha taa
 nwuhugbukwa; obenu l'aa-gbanwegbukotakwanu anyi
⁵² lẹ ntabu-ẹnya lanụ mẹ e -gbuẹpho opu-ogu ono, ee-
 gbu gude goshi lẹ teke ikpazu rwuwaru ono. Teke e
 gbuerupho opu ono; ndu nwuhuru anwuhu etetakota
 dzuru ndzụ ọzo; k'ọphu ẹphe taa nwuhubaedu anwuhu;
 l'ọ gbanwekwaapho anyịbedua. ⁵³ Iphe, unu a-maru
 bụ l'ogwēhu ọwa-a, l'e-rehu erehu-a; chitafutajekwa
 ogwēhu ọphu tee rehuhedu erehu woru kpube onwiya.
 Ogwēhu ọwa-a, l'anwuhuje anwuhu-a chitajekwapho
 'anwuhu anwuhu kpube onwiya. ⁵⁴ Teke ogwēhu-a,
 l'e-rehu erehu-a chitaerupho ogwēhu ọphu tee rehudu

erehu kpube onwiya; ogwehu ọwa-a, l'anwuhu anwuhu-
a chita ọphu taa nwuhudu anwuhu kpube onwiya; noo
teke iphe ono, e deru ono a-vu g'e deru iya. O pfuru su:
“Ọnwu be emekpewaru; lwu ya ree.”

⁵⁵ Gube ọnwu ?denuhunu
ogba-kpi ngu obu?

Gube ilu; ?denuhunu iphe,
iigudeje emekpe ndzu?*

⁵⁶ Anwuhu be ogba-kpi ya bu iphe-eji; ike k'iphe-eji
bukwanuru ekemu. ⁵⁷ Oke-a; Chileke dukwa ike; yebedua
meru g'anyi gbẹ l'eka Nnajiuphu anyi, bu Jizosu Kereshi
lwi-kpee iphemiphe ono.

⁵⁸ Noo g'o gude mu su: unube unwunna mu, mu
yeru obu; unu kpo onwunu g'abara. Unu pfuru pfushia
ike; te ekwekwa g'e mee unu g'unu te etete. G'eka unu
kangojeekwapho l'ejeru Nnajiuphu ozi, nyiberu anyibe
tekenteke; eshinu unu maru l'akanya, unu no l'eka
Nnajiuphu ese ta abudu akanya ola-l'iswi.

16

Okpoga, e gude eyeru ndu ke Kereshi eka

¹ A bya l'okpoga ono, unu gude obu unu anu ndu ke
Chileke le Jierusalemu ono; mu su g'unu meje iya egube
ono, mu ziru Chiochi, nogbaa le Galeshiya g'ephe meje
iya ono. ² Iphe, bu Sonde, a-nwuta nu g'onyenonu
wofutaje iphe ge Chileke mekporerupho o nweberu iphe;
woru kwakobeje iche; g'o to buepho mu -bya temanu
unu agbe teke ono nakohaa ya. ³ Teke mu byaerupho;
mu ederu ekwo nu ndu unu a-hota g'ephe gude iphe ono,
unu nuru ono wolaa Jierusalemu. ⁴ Teke o bu l'oro iphe,
gbaru k'ophu mu e-je; mu l'ephe aswiru jeshia.

* 15:55 15:55 Guna Hos 13:14.

Iphe, Pọlu riru k'ememe

⁵ Mu a-kpapfutakwaa unu mẹ mu -shiepho alì Masedoniya; lẹ mu arikwa k'eshita ẹka ono. ⁶ Ọzo -dụ; mu l'unu anọduwaro mẹ mu -bya; ọzoo mu a-nọkpoonu udzumini ono; g'unu edukwanaa mu ije gẹ mu jeshia ẹka bukpoọ ẹka mu eje. ⁷ L'ọ -buru nta-a, mu aghabu aghabu-a bẹ ọ tọ dukwa mu g'a sụ lẹ mu l'unu humaru. Mu ari lẹ mu -byaepho bẹ mu l'unu a-nọ nwọdu mẹ ọ -bunuru lẹ Nnajiuphu kweru.

⁸ Ọle mu a-nọdu lẹ Efesọsu jasụ l'ọbo Pentikọsutu. ⁹ Lẹ Chileke gbuhaakwaru mu ọzo ọkpobe egbuha gẹ mu jee ozi, e-ye ẹka shi; tẹme ndu l'eme g'ẹphe kpọshia mu iya dụ igwerigwe.

Timoti yẹe Apọlosu

¹⁰ Teke Timoti byaru; unu letakwa ẹnya mee ya g'ọ tųsaru ẹhu. L'unu maru l'oojeru Nnajiuphu ozi gẹ mu eje-a. ¹¹ Ọo ya bụ lẹ-a; g'ọ tọ dukwa onye a-nma iya phulaphula. Unu dukwaa ya ije; g'oogude ẹhu-utso lwa; lẹ mu elekwa ẹnya lẹ yẹle unwunna anyi ndu ọphuu l'atuko swiru lwa.

¹² Ọ -buru kẹ Apọlosu; mbukwapho onye k'ono, anyi l'iya tųkokwarupho ejeru Nnajiuphu ozi ono; mu pfushikwaru iya ike sụ iya gẹ yẹe unwunna anyi ndu ọphuu tųko swiru kpapfuta unu; ọle ọ tọko dudu iya g'ọ bya nta-a. Ọo-bya mẹ ọzo duleru iya phọ.

Opfu, Pọlu gude akpọchi iya ishi

¹³ Sụ-a; unu kwabẹjekwa ẹnya; unu apfuru pfushia ike l'ekwekwe, unu kweru kẹ Kéreshi; unu mejekwa gẹ nwoke l'iphe, bukpoọ iphe, unu eme ememe; unu eshihukwaphọ ike. ¹⁴ Unu gudeje n-yemobu meje iphemiphe, unu eme ememe.

¹⁵ Ụnwunna mu; ọp̄hu unu maru bụ l'ọo Sutifanasu yēe ndibe iya bē bụ ndu e vuchaa ụzo pfuta yeru Kéreshi l'alì Gurisu; tēme ẹp̄he hōfutawaa onwophē dobe; sū l'ẹp̄he a-n̄ọdujēephō eyeru ndu-nsọ ẹka. ¹⁶ G'ọ bụkwaru ẹgube ndu ono bē unu e-meje ip̄he, ẹp̄he pfuru. Nokwaphō g'unu e-meje k'ip̄he, bụkpoo ndu ẹp̄he l'ẹp̄he gba mgba eje ozi bya esekwaphō akanya ono.

¹⁷ Ẹhu atso mu ụtso lẹ Sutifanasu yēe Fochiunetōsu mē Akayikōsu bē byaru nū; kēle ip̄he, unu gege eme bē ẹp̄he mekōtawaru. ¹⁸ Ẹp̄he mewaru g'ẹhu ka mu ebvuru ebvuru bya akakwaphō unubēdua. Ọo ẹgube ndu ono bē a-dūjeru unu lẹ nsọ.

¹⁹ Ndu Chiochi Eshiya l'ekelekwaphō unu-o. Akwila yēe Pirisila mē ndu Chiochi, l'edzukoje l'ulo phē gudekpōo obu phē ekele unu ekele; mbū unubē ndu unu l'ẹp̄he tūgbaru lẹ Kéreshi b̄uru nanū. ²⁰ Ip̄he, bụkpoo ụnwunna anyi l'ekelekōta unu ekele.

Unu ekelekwaphō nwibe unu ekele nmata phē akpa, dū nsọ.

Ekele, shi l'ẹka Pọlu

²¹ Ekele ọwa-a bụkpokwaa mbēdua, bụ Pọlu ede iya l'onwomu ekele unu.

²² G'onye ete eyeduru Nnajiuphu, bụ Jizōsu Kéreshi obu; bụkwaru onye a tūru Ọnu. Marana ta!*

²³ Gē Nnajiuphu, bụ Jizōsu kéreshi meeru unu eze-ip̄he-oma.

²⁴ Mu yekōtaru unu obu g'unu ha op̄fu l'anyi l'unu tūkoru tūgba lẹ Kéreshi, bụ Jizōsu. Nokwa g'ọ dū.

* ^{16:22} ^{16:22} Ip̄he, Marana ta f̄utaru l'op̄fu ndu Aramu b̄u: Jiko; bya Nnajiuphu!

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d